

# ANG TINGOG SA ILHANAN



Salamat kanimo. Hinaut nga magpabilin ta sa pagtindog sa makadiyot lamang, samtang atong basahon ang Pulong, diretso ta mismo sa Pulong niining gabhiona, aron dili ta makagamit ug hataas kaayo nga panahon. Buot ko nga moabli kamo uban kanako, niining gabhiona, diha sa Basahon sa Exodus, ug sugod sa ika-upat nga capitulo sa Basahon sa Exodus.

*Ug si Moises mitubag ug miingon, Apan, ania karon, sila dili motoo kanako, dili usab magapatalinghug sa akong tingog, kay magaingon sila: Wala magpakita kanimo ang GINOO.*

*Ug ang GINOO miingon ngadto kaniya, Unsa ba kana nga anaa sa imong kamot? Ug siya mitubag, Usa ka sungkod.*

*Ug siya miingon kaniya, Ibalibag kana sa yuta. Ug iyang gibalibag sa yuta, ug kadto nahimo nga usa ka bitin; ug si Moises milikay gikan niini.*

*Ug unya miingon ang GINOO kang Moises, Tuy-ora ang imong kamot, ug kupti siya sa ikog. Ug iyang gituy-od ang iyang kamot, ug gikuptan niya kini, ug kini nahimong sungkod sa iyang kamot:*

*Aron motoo sila nga nagpakita kanimo ang GINOO nga Dios sa ilang mga ginikanan, ang Dios ni Abraham, . . . ang Dios ni Isaac, . . . ang Dios ni Jacob, nagpakita kanimo.*

*Ug ang GINOO miingon pa gayud kaniya, Isulod karon sa imong dughan ang imong kamot. Ug gisulod niya ang iyang kamot sa iyang dughan: ug sa iyang gikuha kini, ania karon, ang iyang kamot gisanla ug naputi ingon sa niebe.*

*Ug miingon siya, ibalik mo pagsulod ang imong kamot sa imong dughan. Ug iyang gibalik ang iyang kamot sa pagsulod sa iyang dughan; ug gikuha niya kini gikan sa iyang dughan, ug, ania karon, kini . . . naulian ingon sa iyang lain nga unod.*

*Ug kini mahitabo, nga kong sila dili motoo kanimo, ni mamati sa tingog sa una nga ilhanan, sila motoo sa tingog sa ikaduhang ilhanan.*

<sup>2</sup> Atong iduko ang atong mga ulo. Ug uban sa atong mga ulo nga giduko, ug ang atong mga kasingkasing, usab, akong gihunahuna dinhi niining gabhiona kon aduna may mga hangyo alang sa pagpaampo? Mahimo ba nga inyong ipahibalo samtang

inyong ipataas ang atong mga kamot. Ang Dios magatugot sa inyong mga hangyo.

<sup>3</sup> Among Langitnong Amahan, among giisip kini ingon nga usa ka kahigayonan, ang pagduol Kanimo pinaagi sa pag-ampo, nga magaduol sa Ngalan ni Ginoong Jesus. Ug nga gikasaaran pinaagi Kaniya, nga kong mangayo kami ug bisan unsang butang sa Iyang Ngalan, ihatag kini. Nahibalo Ka sa panginahanglanon sa matag usa kanamo. Nahibalo Ka unsay kahulogan sa among mga kamot samtang among gipataas kini. Ako nag-ampo, Amahan, nga Imong tubagon ang matag hangyo niining gabhiona. Angkuna ang himaya.

<sup>4</sup> Ug karon tugoti nga ang dakung Magtutudlo sa Pulong, ang Espiritu Santo, mokunsad kanamo, niining gabhiona, ug ipadayag ang Iyang Kaugalingon kanamo, ug-ug himuong dayag ang Iyang kaugalingon kanamo, pinaagi sa-sa panghimatuod sa Iyang pagkabanhaw. Hinaut nga moanhi Siya sa among taliwala, niining gabhiona, Ginoo, ug-ug duawon ang among mga kasingkasing. Makigsulti kanamo pinaagi sa mga butang nga Iyang gisaad alang niining adlaw. Hinaut nga ang mga Pulong nga gisaad alang niining panahona mapadayag kanamo, aron niana makapaniguro kami, dinhi niining dakung magubotong takna nga Imong giingon nga moabot dinhi sa ibabaw sa yuta, aron sa pagsulay sa tanang mga katawhan. Ug kini moabot gayud nianang panahona, Amahan, sa dihang ang tawo gisulayan. Ug aniy daghang nagakalahing mga angulo, hangtud nga wala nay usang mahibalo kong unsay angay'ng pagabuhaton. Apan, Ginoo, ako nag-ampo nga Imong ipahibalo kanamo, niining gabhiona, nga ania Ikaw ug nagauban kanamo, ania Kini dinhi aron sa pagtabang kanamo. Ihatag ang among mga hangyo, tungod kay kini among gipangayo sa Ngalan ni Jesus. Amen.

Makapanglingkod na.

<sup>5</sup> Ako sa kanunay nagakaulahi lang diyutay sa matag gabii. Ug sa kanunay naghunahuna ako *niining* micropono, apan kini usa sa mga rekorder. Apan kining ania *dinhi*, sa akong pagtoo, mao ang usa nga akong angay paminawan, o sultihanan.

<sup>6</sup> Ugma sa gabii mao ang gabii sa kumbeti, busa ayaw kalimot niini. Sa akong pagtoo kini maoy . . . Sa akong pagtoo napahibalo na kini, kong hain ang mga katawhan moadto.

<sup>7</sup> Sa tinud-anay among gipasalamatan ang inyong pagduyog diha sa dagkung mga butang nga gibuhad sa atong Ginoo.

<sup>8</sup> Karon, niining gabhiona, sa akong pagtoo nga, gawas kon mahibaloan nato sa Pulong sa Dios, dili nato masayran kong unsay pagabuhaton. Dili nato mabatonan ang pagtoo hangtud atong masayran kong unsay kabubut-on sa Dios. Ug, unsay, ug unya kong atong mahibaloan nga kini kabubut-on sa Dios, ang

Pulong sa Dios naga-ingon sa usa ka butang, nan mahimo tang malipayon sa pagsunod niana.

<sup>9</sup> Karon kong ang Ginoong Jesus nagalakawlakaw palibot, sa linawas, sa ibabaw sa yuta niining gabhiona, diha sa unod, ug Siya nag-ingon, “Ugma moulan, sa tibuok adlaw,” karon masayon alang kanako ang pagdala ug payong kong molakaw ako sa buntag, tungod kay Iyang giingon kini. Karon, kong wala kini Niya isulti, nan dili ako mahibalo unsay paabuton. Busa mao kana ang paagi niini, sa bisan unsang butanga nga atong pagabuhaton, atong tinguhaon nga mahibaloan ang takna, ang panahon nga atong gipoy-an.

<sup>10</sup> Ug alang sa mga bag-o pa lamang, kining semanaha atong gitinguhaan ang pagpakita nga ang Dios, gikan sa sinugdanan, nasayod sa katapusan. Kana maoy nakapahimo Kaniyang walay kinutoban. Kong Siya may kinutoban pa, walay kinutoban, Siya dili mahimong Dios. Ug kinahanglan nga Siya mahimong gamhanan sa tanan, anaa sa tanan, nasayud sa tanan, ug gamhanan sa tanan, aron mahimong Dios. Mao kanang gamhanan sa tanan, nahibalo sa tanan mga butang, diha sa tanan mga dapit, ug-ug-ug nahibalo sa katapusan sukad pa sa sinugdanan. Kong dili Siya ing-ana, nan dili Siya Dios.

<sup>11</sup> Busa wala gayo’y butang nga makawang. Kita kato. Apan wala sa Pulong sa Dios; kini nagpitikpitik sama sa orasan. Ug kong kanang taknaa moabot na alang niini aron mahitabo, ang Pulong nga gigahin alang nianang maong panahon, kini mahitabo. Kita tingali’g maghunahuna nga kini . . . nga kini dili mahitabo. Usahay kini nagakahitabo ug wala kita mahibalo niini. Si Jesus nag-ingon, usa niana ka higayon . . .

<sup>12</sup> Sila miingon Kaniya, “Ngano man nga ang-ang . . . ang tanan mga escriba nag-ingon nga si ‘Elias kinahanglan mouna usa sa pag-anhi?’” Tan-awa, karon, sila mitoo niana. Sila nagatoo nga si Elias moabot.

<sup>13</sup> Ug si Jesus mitan-aw kanila, ug miingon, “Si Elias nahianhi na, ug wala kamo makaila kaniya.” Nakita n’yo? Karon, tan-awa, kini milabay diha kanilang mga escriba, mga ministro, mga tinun-an. Ug kadto mao si Juan Bautista, ug siya miabot diha sa matag paagi nga ang Elias moabot, ngani wala nila siya hiilhi.

<sup>14</sup> Ug karon angay kini kanato ang pag-ila sa takna nga atong gipuy-an, ug ang panahon nga atong gipuy-an. Tungud niana, buot ako makigsulti niining gabhiona sa: *Ang Tingog Sa Ilhanan*.

<sup>15</sup> Usa ka talagsaong teksto, ngani ang Dios nagabuhat ug talagsaong mga butang diha sa dili kasagarang mga paagi. Mao kana ang nakapahimong Dios Kaniya, tungud kay Siya-Siya usa ka supernatural. Ug sa matag butang nga Iyang ginabuhat, Iyang-Iyang gibuhat kini, Iyang mahimo kini sa supernatural, tungod kay Siya supernatural.

<sup>16</sup> Karon, *Ang Tingog Sa Ilhanan*. Ug kini mao ang usa... Anaay tingog diha sa ilhanan. Anaay tingog sa dugo. Ang Dugo misulti gikan sa yuta, ug-ug sa uban pa, “Ang matarung nga dugo ni Abel nagtuaw batok kang Cain.” Ug ang Biblia nag-ingon, “Ang Dugo *ni* Jesus Cristo nagatuaw ug labi pang mga dakung butang kay sa gihimo sa dugo ni Abel.”

<sup>17</sup> Karon ang atong hugna niining gabhiona, o ang atong eksena, ginabuksan diha sa Exodus. Ug ang panahon sa Exodus mao ang takna sa pagpagula, ug ang exodus haduol na.

<sup>18</sup> Si Moises, ang ulipon sa Ginoo, gitawag alang sa usa-usa ka talay sa bulohaton. Ug nagabuhat sa kong unsay iyang ginahunahuna, siya usa kadto ka manggialamon sa Egipto, nakakat-on sa tanan nga-nga kaalam sa mga Egiptohanon, ug daw ingon nga siya anaay usa-usa ka pamaagi, nga ingon nga usa ka inila nga maalamon nga sundalo, nga mahimo niya ang pagpahigawas sa iyang mga katawhan gikan nianang pagka-ulipon, tungod kay siya mao ang mosunod nga umaabot nga Faraon. Ug unsa kini kasayon alang kaniya sa pagbuhat niini. Apan, nakita ninyo, kong kana maoy kahimtang sa panghitabo, nan kini mahimo unta usa ka butang nga kasagaran.

<sup>19</sup> Ang Dios dili mohimo sa kasagarang mga butang. Siya nagapanghimo sa supernatural nga mga butang aron sa pagpamatuod sa Iyang Kaugalingon.

<sup>20</sup> Ngani gikan sa kap-atan ka mga katuigan nga pagtuon, sa kinalabwan nga iyang maabot, ug ang labing maayo nga iyang maangkon, ang labing maayong pagkatinun-an nga iyang makuha sa pagtuon; uban sa pagpanabot nga gikan sa iyang inahan, iyang magtutudlo, nga siya mao ang usa nga mopahigawas sa katawhan; ug migawas siya pinaagi sa gahum sa iyang pagpanabot, ug mipatay ug usa ka Egiptohanon. Ug, sukad niadto, nasuta nga kadtong iyang paningkamot napakyas, ug dayon mikalagiw ngadto sa kamingawan.

<sup>21</sup> Ug kon unsa ang Egipto, diha sa edukasyon, nga gibutang diha kaniya sulod sa kap-atan ka mga katuigan, gikinahanglan sa Dios ang lain pang kap-atan ka mga katuigan aron pagpapas niini gikan kaniya, kita n’yo, aron siya dili na mosalig diha sa iyang mga kalagdaan sa edukasyon. Siya magasalig sa supernatural.

<sup>22</sup> Ug karon ang takna miabot na nga ang Dios naghimo ug usa ka saad, ngadto kang Abraham, kap-atan ka mga katuigan sa wala pa kanang panahona, nga ang iyang kaliwat magadumuluong sa usa ka langyaw nga yuta, ug sila pagulaon. Tapus sa kap-atan ka mga katuigan, sila pagapagulaon pinaagi sa gamhanang kamot. Iyang ipahigawas ang iyang katawhan pinaagi sa usa ka gamhanang kamot. Ug sa diha ang panahon sa saad nagkahiduol na, kana mao ang panahon nga gibutang

na sa Dios si Moises sa eksena. Si Moises, diha sa iyang hingpit nga kapakyasan, mikalagiw ngadto sa kamingawan.

<sup>23</sup> Karon ang tipo dinhi, aniay usa ka talagsaung tipo nga dili nato gusto mapakyas. Kita n'yo? Gitipo, ang Dios nagadala ato sa Israel, ang Iyang katawhan, gikan, sa usa ka nasud, usa ka nasud gikan sa usa ka nasud. Usa ka Nasud nga gikan sa usa ka nasud, usa ka matahum nga panag-ingnan karon, nga ang Dios nagatawag sa Iyang Pangasaw-onon pagawas sa iglesia, Kristohanong Pangasaw-onon nga gikan sa Kristohanong simbahan, usa ka Pangasaw-onong Iglesia nga gikan sa usa ka iglesia, kinsa mao ang tinawag, sa Biblia, gipasabut.

<sup>24</sup> Anaay akong pipila ka mga sinulat ug mga Kasulatan nga gisulat dinhi, alang niining pagtulon-an karong gabii.

<sup>25</sup> Kini gitawag, usahay, nga “Ang Pinili, ang Napili, o ang Salin sa kaliwat sa babaye.” Kato gitawag nga, “ang Pangasaw-onon,” nga ang Dios, pinaagi sa Iyang nahibaloan nang daan, gikatagana. Kana mao, ang Pangasaw-onon nga migula gikan sa iglesia. Kita n'yo, ang kinatibuk-ang butang usa ka iglesia, apan ang Dios nagkuha ug usa ka katawhan gikan nianang maong iglesia, ingon nga usa ka Pangasaw-onon. Siya nag-ingon nga Iyang buhaton. Ug Iyang gibuhat kini, himatikdi, o Iyang pagabuhaton kini.

<sup>26</sup> Matikdi, tan-awa kong giunsa Niya kini pagbuhat, ug ang pamaagi ug giunsa Niya ang pagbuhat niini. Gusto nato tanawon kini karon, maingon sa Iyang pagpagawas sa Israel, kon giunsa Niya pagbuhat kato, ug ang pamaagi nga Iyang-Iyang gibuhat kato.

<sup>27</sup> Matikdi pag ang panahon sa gisaad nga Pulong pagatumanon na, ang Dios nagtawag kang Moises, pinaagi sa pagkatagana nang daan, ug gipili siya alang sa bulohaton. Kita n'yo? Ang Dios sa kanunay anaay tawo sa tukmang panahon, sa panahon. Walay mapakyas diha sa Dios. Iyang gipamulong kini; kini dili mahimong mapakyas. Kong kini mapakyas man, nan ang Dios mapakyas, 'kay ang Dios mao ang Pulong.

<sup>28</sup> Matikdi, karon, ang Pulong kinahanglan nga igapadayag. Ug sa diha ang Pulong kinahanglan mapadayag na, sa gisaad, ang Dios sa kanunay nagapadala sa usa ka propeta aron sa pagpadayag nianang saad, tungod kay ang Pulong sa Ginoo nagaabot ngadto kaniya.

<sup>29</sup> Si Moises, gikatagana nang daan alang sa katuyoan, gitawag alang sa maong bulohaton. Wala nay si bisan kinsa nga makabuhat niini.

<sup>30</sup> Pag ang Dios may-may gitawag nga usa ka tawo alang sa usa ka bulohaton nga pagabuhaton, wala nay usa nga makahimo sa pagpuli sa maong puwesto. Walay si bisan kinsa nga makakuha sa imong puwesto, sa imong pagkatalagsaon.

31 Unsa ka daghan nga napamalandongan ko, kun giunsa ko sa pagtinguha nga mahibutang sa puwesto ni Oral Roberts, kon unsa ko kagusto ang puwesto ni Billy Graham, ang uban pa nga sama niana. Sama kang Billy Graham, mosulti diha sa atubangan sa katawhan, tawagon ang mga makasasala ngadto sa halaran; unya hikalimtan kini ug mopauli, dili na kinahanglan nga mobarog pa didto ug makigbisog pag-usab. Ako dili mahimong si Billy Graham, ni si Billy Graham mamahimong ako. Kaming duha . . . Ako dili mahimong si Oral Roberts; si Oral Roberts dili mahimong ako.

32 Kamo, ang matag usa, gikapahimutang diha sa laraw sa Dios, alang sa iyang buluhaton lamang. Ang usa nagapuasa sa tanang panahon ug makigsulti uban sa Dios, samtang ang laing usa maghingilin sa mga yawa tungud kay kining usa nagapuasa. Apan kini ang tibuok Lawas ni Cristo maoy nagakaduyog sa pagbuhat, sa panaghiusa. Sa diha nga atong makita kining mga babag sa denominasyon nga maoy nagabahinbahin kanato, kana maoy nakapasakit sa akong kasingkasing, kita n'yo, tungud kay kana maoy butang nga nakapabulag kanato. Usa ra kita.

33 Walay dakung katawhan sa taliwala nato, walay bantugang katawhan dinhi kanato. Kitang tanan manag sama ra. Kita mga anak sa Dios. Anaay usa lamang nga daku dinhi kanato, ug kana mao si Cristo. Kinahanglan nga atong ilhon Siya. Ug kong magapangita kita ug kadungganan, sa usa gikan sa usa, dili ta makabaton ug pagtoo, tungod kay anaa nay atong pagtoo diha usa ug usa. Kinahanglan kita may pagtoo kang Cristo. Siya maoy Usa ania kanato nga diin ang atong pagtoo kinahanglan ipahimutang, ug unya ang pagtoo diha sa kon unsay Iyang ginabuhay ug gikatugyan kanato.

34 Karon, walay usa nga makahimo sa pagkuha sa dapit ni Moises. Bisan pa kong unsa kalayu ang iyang madaganan, ug bisan unsa pa niya ang pagpaningkamot sa pagpahilayo gikan niini, bisan pa niana ang Dios nasayud kong unsay Iyang ginabuhay. Siya nahibalo unsay Iyang tangtanganon ug pagahimoon kang Moises. Kining mga butanga kinahanglan nga mahitabo. Karon, bantayi, walay usang makahimo sa pagkuha sa iyang dapit.

35 Karon bantayi. ang Dios mihatag kaniya ug usa ka ilhanan, aron pamatud-an ang iyang pagkatinawag ug mga pagpangangkon, sa diha siya niadto sa Egipto.

36 Karon, Ang Dios sa kanunay nagahatag sa mensahero sa usa ka ilhanan, ug usa ka tingog sa maong ilhanan. Ug kanang ilhanan gapaila sa maong tawo, kong kini nahisulat diha sa Kasulatan.

37 Sama kang Juan nga nag-ingon, “Ako mao ang tingog nga nagasinggit sa kamingawan.”

Sila miingon, “Ikaw ba ang Mesiyas?”

38 Siya mingon, “Ako dili mao ang Mesiyas. Apan ako mao ang usa ka nagasinggit sa kamingawan, maingon sa giingon ni propeta Isaias.” Siya makahimo sa dayag sa pag-ila sa Iyang kaugalingon.

39 Ug karon, human niana, sa diha, atong makita nga ang Dios, sa kanunay, dili gayud mag-usab sa Iyang pamaagi sa pagbuhat sa bisan unsang butang. Siya dili mahimong mausab. Ang Dios magbuhat sa bisan unsang butang nga tukma sa maong paagi, sa diha Iyang-Iyang gipahiluna ang tanan Niyang pamaagi.

40 Sama sa akong giingon sa miaging gabii, Siya naghimo sa usa ka pagbuot, ang tawo mamaluwas dapat pinaagi sa pag-ula sa Dugo sa Usa ka walay sala. Atong gipaningkamotan ang bisan unsang mga butang, aron ang tawo maluwas. Atong gisulayan siya sa pagdala sa usa ka dapit diin atong gibuhat ang usa ka ciudad, si Nabucodonosor ang nagbuhat. Ug nagbuhat sila ug usa ka tore, si Nimrod nagbuhat. Adunay sila’y balaod. Ug anaay ilang mga templo. Anaay ilang mga kasimbahanan. Anaay ilang mga kapunungan. Anaay ilang mga pamaagi sa edukasyon, mga sistema pang-denominasyon, nga naninguha sa pagpaduol sa tawo ngadto sa Dios. Kini, sa bug-os, nangapakyas. Kini sa kanunay mapakyas gayud. Kini magabalik gihapon sa giula nga Dugo!

41 Ang pamaagi sa Dios sa pagbuhat ug bisan unsang butang gisulti diha sa Iyang Pulong. Ug kining Pulong mao ang kinatibuk-ang pinadayag ni Jesus Cristo, walay bisan unsa nga igadugang Niini o taktakon gikan Niini. “Ang si bisan kinsa nga magabuhat niini,” ang Biblia nag-ingon, “ang iyang bahin pagakuhaon gikan sa Basahon sa Kinabuhi sa Cordero,” kong siya magadugang sa bisan unsang butang o taktakon ang bisan unsang butang gikan Niini. Dawata lamang Kini sa paagi sa pagkasulat Niini.

42 Ang Biblia wala magkinahanglan kang bisan kinsa aron paghubad Niini, ang Dios sa Iyang Kaugalingon maoy maghuhubad. Iyang ginahubad kini pinaagi sa paghimo nga kong unsay Iyang giingon matuman. Mao na kana. Kong ang Dios nagsulti niini, ug Iyang gibuhat kini, mao ra na. Wala Kini magkinahanglan ug maghuhubad. Ang Biblia nag-ingon, “Kini dili mahimoan sa kinaugalingong paghubad.”

43 Ang pamaagi sa Dios sa pagbuhat niini! Sa kanunay’ng magpabiling matinud-anon ngadto sa Iyang gipadala nga ilhanan, Iyang gisundan pinaagi sa Iyang tingog; sa matag, sukad pa, nga ang Dios nagapadala sa usa ka ilhanan sa yuta. “Karon ang Dios dili mobuhat ug bisan unsa,” ang Biblia nag-ingon, “hangtud nga Iyang ipadayag kini una ngadto sa Iyang mga alagad ang mga propeta.” Karon nga, kamo. . . Kong sayop man kana, nan ang uban pa niini sayop, kita n’yo. Siya dili

gayud mobuhat ug bisan unsang butang hangtud nga Iyang ipadayag kini.

<sup>44</sup> Ug kanang magtatan-aw, ang propeta, kinahanglan nga maila, nga kong unsay iyang ginapanagna, atong makita diha sa Numeros 12:6, nga kong unsay Iyang ginasulti nagakahitabo. Nan, tuohi kini. Apan kong kini dili nagakahitabo, nan ayaw pagtoo niini. Ug kinahanglan nga kini alang niana, ang Iyang. . . Bisan unsa pay iyang ginasulti, ug kini nagakahitabo, ug bisan unsa pa; kong kini dili sumala sa Pulong, nan kini sa gihapon sayop. Kini kinahanglan nga mokuyog sa Pulong. Kinahanglan Niini nga mapahimutang subay sa Pulong alang sa ilhanan nianang taknaa, ang panahon nga ilang gipoy-an.

<sup>45</sup> Karon, kini gisaad na sa Dios, nga Iyang pagulaon ang Iyang katawhan pinaagi sa kusgan nga bukton. Karon, sa diha kining Pulong, Siya wala nagtawag sa usa ka pari, Siya wala nagtawag sa usa ka rabi, Siya wala nagtawag sa usa ka punoan. Siya nagtawag sa usa ka magbalantay sa carnero, didto sa kabukiran, usa ka kagiw, nahimugso, gikatagana nang daan nga propeta nga dili gusto sa iyang bulohaton.

<sup>46</sup> Kong makadungog ka ug katawhan nga nagtinguha nga mahimong ingon *niini*, *niana*, o ang *uban pa*, usa ka butang, bantayi lamang, dili gayud sila gamiton sa Dios. Ang Dios pangitaon gayud si Moises, aron gamiton siya. Iyang kinahanglan pangitaon pa si Pablo, aron gamiton siya. Iyang. . . Kana mao ang tawo nga dili gustong mobuhat niini, dili sila gusto nianang mga butanga; ug unya gamiton sa Dios kanang tawhana, nga dili siya mobuhat, aron niana Iyang ikapakita ang Iyang himaya pinaagi niini.

<sup>47</sup> Karon bantayi. Ang matag-ang matag matuod nga pinadala nga ilhanan sa Dios gisundan sa usa ka tingog. Karon inyong himatikdan dinhi, ang teksto mao ang. . . ang ilhanan ug ang tingog. “Kong dili nila toohan ang tingog sa unang ilhanan, nan ilang toohan ang tingog sa ikaduhang ilhanan.” Karon, ang ilhanan anaay tingog. Ug, karon, ang matag matuod nga pinadala sa Dios nga ilhanan anaay tingog, ug kanang tingog dapat mosulti sumala sa Pulong nga gihatag alang niadtong adlaw, sa tukma gayud.

<sup>48</sup> Kong ang tingog moabot, mao ra nga karaang tingog sa samang karaang. . . Imong makita ang usa ka ilhanan, kaayo, ug ang ilhanan nga ginabuhat sa tawo mao rang karaang tulonghaan sa salabutan, nan kamo makaingon dayon, “Kana wala nagagikan sa Dios,” kong kini nagapabilin nga nagapaila sa mao gihapon nga karaang tulonghaan sa salabutan. Kini dili gayud nahitabo. Dili pa nahitabu. Kini mahimong supak sa programa sa Dios.

<sup>49</sup> Kini kinahanglan nga usa ka butang nga bag-o. Kinahanglan nga kini usa ka butang nga dili hisabtan sa mga



katawhan. Kinahanglan nga kini ang...o kini dili mahimong ipadala. Dili kini kinahanglang nga ipadala, kong mao ra sa gihapong tulonghaan sa teolohiya. Kinahanglan nga kini usa ka butang nga pinasahi, apan kinahanglan nga kini mailhan diha sa Pulong, nga mao kini alang nianang adlaw. Kita n'yo, ang mga kasiguruhan sa Pulong sa Dios, kinahanglan nga ingon kini niana. Walay pasayup-sayop niini. Kinahanglan nga kini ang Kamatuoran; kinahanglan nga gipaluyohan sa Dios, ang Kamatuoran. Ug ang tawo nga nagasulti niini kinahanglan nga gipaluyohan sa Dios, nga usa ka magtatan-aw nga gikan sa Dios, o kini sayup; dili man gani sila-dili gani makakita niini, man lang, dili gani motoo niini.

<sup>50</sup> Ang mga ilhanan-nagagikan sa Dios. Ang ilhanan nga nagasunod...O, ang tingog nga nagasunod sa ilhanan kinahanglan nga tingog sa Dios nga nagasulti gikan sa Pulong, alang nianang panahona. Nakasabot ba kamo niini? [Ang congregasyon miingon, "Amen."—Ed.]

<sup>51</sup> Ang Dios nagahatag sa mga ilhanan. Alang sa unsa mang katuyoan ginahimo Niya kini? Sa kanunay nagahatag sa mga ilhanan! Iyang giingnan sila nga mao kana ang ilang pangitaon diha Kaniya, ang mga ilhanan. Ang Dios nagahatag sa mga ilhanan aron sa pagdani sa pagtagad sa Iyang katawhan. Karon atong tun-an kini, pag-ayo. Kita n'yo, ang mga ilhanan gihatag aron pagdani sa pagtagad sa katawhan. Tungud kay, kon ang pinadala sa Dios nga ilhanan gihatag, ang Dios andam na nga mosulti. Ang Dios andam na nga mosulti, pag ang ilhanan gihatag na. Kong kini nagagikan sa Langit, kini nagagikan sa Dios, ug ang Dios andam na nga mosulti ug Iyang ginapaningkamotan ang pagdani sa pagtagad sa katawhan.

<sup>52</sup> Ug ang Pulong nagaabot ngadto sa Iyang propeta. Ug ang propeta nailhan pinaagi sa ilhanan nga iyang ginapakita, ug unya siya moduol sa Pulong ug ang Pulong mahimong dayag. Mao gyud kana; wala na magkinahanglan pa ug bisan unsang hubad. Gihubad na kini sa Dios. Tan-awa, kini hingpit gayud nga walay sama.

<sup>53</sup> Karon matikdi, ang Dios naghatag ug mga ilhanan aron pagdani sa pagtagad sa katawhan.

<sup>54</sup> Ania, ang kahoy'ng nagdilaab mao ang ilhanan aron pagdani sa pagtagad sa propeta; ang kahoy'ng nagdilaab. Si Moises didto sa, likud sa kamingawan, nag-atiman sa iyang carnero, usa ka tigulang nga magbalantay sa carnero, kawaloan ka tuig ang panuigon, hataas nga bungot; nagalakaw-lakaw, didto padulong sa tampi sa usa ka karaang naandan nga dalan, usa niana ka mainit nga buntag, tingalig. Ug unya, sa kalit, dihay usa ka kahoy nga nagdilaab sa Kalayo, ug kadtong maong kahoy wala maugdaw. Bueno, talagsaon gayod kato tanan.

55 Karon, si Moises ingon usa ka siyentista, kinsa, siya gikatudloan sa tanan nga kaalam sa mga Egiptohanon, ug sila mga mas labaw nga mga siyentista kay sa anaa kanato karon; ngani sa ingon nga usa ka siyentista, daw siya miingon, “Karon moadto ako sa pagtan-aw kong unsang matanga sa ma- . . . sa kemiko ang gisablig diha sa mga dahon, nga ang kahoy wala man masunog.” Kita n’yo, kong iyang giduol kini pinaagi sa siyentistang pamaagi, Kini dili gayud misulti ngadto kaniya.

56 Ug maingon man usab kini karon, pag kita nagapaningkamut sa pagduol pinaagi’g tulonghaan ug edukasyon, sa usa ka syentipikong pamaagi, imong mapakyas ang Dios sa usa ka milyon ka milyas. Duola kini nga sama kang Moises, uban sa iyang sapatos nga hinubo; mapaubsanon, maaghop.

57 Ug, karon, kato mao ang ilhanan aron sa pagdani sa propeta. Karon, kato, kanang ilhanan kinahanglan adunay usa ka tingog. Ug sa diha kanang tingog misulti, kong dili pa Kato uyon sa Kasulatan, dili ako motoo nga ang propeta magpatalinghog niini. Apan matikdi kong unsa ang pagkauyon sa Kasulatan sa maong tingog nga nag-uban sa ilhanan, kini nagpamatuod nga kadto mao ang Dios, tungud kay Siya miingon, “Akong nadungog ang pag-agulo sa Akong mga katawhan, ug nahinumdom Ako sa saad nga Akong gihimo ngadto kanila.” Kita n’yo, ang ilhanan, dayon ang sumala sa Kasulatan nga tingog nga nagpaluyo sa ilhanan.

58 Karon sa tukma nagpakita kana sa unsay akong gihulagway dili pa lamang dugay. Kinahanglan nga Kini usa ka ilhanan nga gikan sa Dios, ug, kong kini mao man, adunay usa ka Kasulatanong tingog nga nagpaluyo niini, alang sa saad nianang adlaw. Dili sa samang karaang panabot; ang mga rabi ug mga butang nga gitudlo sa maong mga pagpanabot, o sa tanang butang, sa kanunay, sa gihapon, ang mga pari, ug uban pa. Apan kini maoy usa ka butang nga bag-o, ug kini uyon sa Kasulatan, kini usa ka saad; ug usa ka ilhanan aron sa pagdani sa propeta.

59 Ug unya, Siya misulti karon, sa dili pa siya molugsong ngadto, kinahanglan nga anaay iyang usa ka butang aron sa panghimatuod sa iyang kaugalingon ingon nga usa ka propeta, kita n’yo, sa dili pa nila siya dawaton. Miingon, “Dili sila moingon nga ang Ginoo nagpakita kanako.”

60 Miingon, “Nan, hatagan Ko ikaw ug duha ka mga ilhanan nga pagabuhaton, ug kana maoy makapadani sa pagtagad sa mga katawhan. Ug sa dihang maangkon na ang pagtagad sa mga katawhan, nan isulti kining maong mga pulong ngadto kanila, ‘Ako mao ang Dios ni Abraham, Isaac ug Jacob, ug Akong nahinumduman ang Akong gisaad.’ Ug gipadala Ko ikaw didto aron pagpahigawas kanila, ug Ako magauban kanimo.”

61 Nahimatikdan ba ninyo ang iyang unang ilhanan? Iyang nasugamak ang tanan nga mga pagpanundog gikan kanila. Ang matag usa misulay sa pag-itsa sa serpinti. Mao kana'y . . . Kong kana dili pa mao ang lakat sa katawhan, wala ako mahibalo kong unsa pa, tan-awa. Kita n'yo? Apan unsa man nga matang sa tingog ang anaa sa ila sa luyo niini? Wala; ang Egiptohanong tingog sa kalibutan. Bisan pa ilang mahimo sa pagpasundayag ang ilhanan, apan ang sa ila walay tingog sa luyo niini, aron sa pagpamatuod niini. Apan si Moises anaay MAO KINI ANG GIINGON SA GINOO. Mao kadto ang kalainan. Ang mga manunundog nagpadayon sa hataas nga panahon, apan sa katapusan kini nahanaw.

62 Nahibalo ba kamo nga ang Biblia nag-ingon nga kana mahitabo usab sa katapusang mga adlaw? “Maingon nga si Jannes ug si Jambres misupak kang Moises, sa ingon man usab ang tawo nga dautan ang panghunahuna hinukman bahin sa Kamatuoran.” Kinsa ang Kamatuoran? Si Jesus Cristo mao ang Kamatuoran. Kita n'yo? “Hinukman nga salabutan bahin sa Kamatuoran.”

63 Karon si Jehova mosulti pinaagi sa Iyang gisaad nga Pulong. Ngani Iyang kinahanglan kining propeta mahiandam aron ipadala. Tungud kay, kini anaa sa kanunay subay sa linya sa Iyang panghunahuna, sa linya sa Iyang pagbuhat, matag panahon mopadala sa Iyang propeta kauban ang Pulong, ug paluyohan ang propeta.

64 Sa makausa, kini ang gisaad nga ilhanan. Usa ka propeta, siya mismo, usa ka ilhanan. Ang Biblia nagsulti sa ingon. Kong makita na ninyo nga ang mga kapanahonan gapangagi, ug unya makita nga nagsingabot na . . . Kuhaa ang kasaysayan sa Biblia, tun-i kini. Sa matag higayon nga inyong makita ang hataas nga panahon ang nangagi na; kon sa diha inyo nang nakita ang usa ka propeta nga mipakita na, kini mao na ang ilhanan sa paghukom. Ang Dios mohimo na sa paghukom sa kalibutan, sa dihang Siya . . . o ang nasud, o ang katawhan, sa diha imo nang nakit-an ang propeta gasingabot na. Ako nang nawali ang mahitungod niini, kamong magti-teyp hinumdumi, ang . . . *Usa Ka Matuod Nga Ilhanan Nga Wala Makita*. Ila sa kanunay wala makita kini, ila sa kanunay wala makita kini, apan usa kadto ka ilhanan sa umaabot nga paghukom.

65 Karon ang Iyang Pulong natuman diha sa Iyang tingog. Unsay Iyang mga ginasaad, niana Iyang ginatuman ang Iyang Pulong pinaagi sa tingog.

66 Ang pag-abot sa propeta maoy usa ka pasidaan nga ilhanan nga ang paghukom duol na. Sa gihapon ingon gayud niana. Tugoti lamang ako sa pagkutlo ug usa.

67 Tan-awa si Noe nga mitungha sa katapusan, diha sa-diha sa mga adlaw sa kalibutan nga wala pa ang lunop, usa ka

propeta ang nagapanagna. Unsa man kadto? Ang Paghukom miigo dihadiha dayon.

<sup>68</sup> Si Moises miabot ngadto sa Egipto, usa ka propetang gipaluyohan uban sa mga ilhanan sa pagka-propeta. Unsa may nahitabo? Ang Paghukom miigo sa Egipto dihadiha dayon.

<sup>69</sup> Si Elias miabot diha sa eksena, ang propeta, ug nanagna ngadto kang Ahab ug niadtong nasud. Unsa may nahitabo? Ang Paghukom miigo niini dihadiha dayon. Tinuod.

<sup>70</sup> Si Juan Bautista miabot, ingon nga usa ka ilhanan. Siya usa ka propeta. Siya usa ka propetang ilhanan nga miabot sa yuta. Sila nasayud, sa panahon nga moabot na siya, ang Mesiya mosulti, sunod kaniya. Kini kinahanglan mahitabo, kay, kuhaon ang-kuhaon ang pinili.

<sup>71</sup> Alang man sa unsa kini mao ang pagkuha sa piniling katawhan nga magapanggula, sama sa mga adlaw ni Noe. Sama sa mga adlaw ni-ni Elias, ang pito ka libo o pito ka gatus, o unsa man kadto, nga wala moyukbo sa ilang mga tuhod, aron tawgon sila paggawas. Si Juan nagtawag paggawas sa pinili, ug gitugyan kini ngadto kang Cristo sa diha Siya miabot, gikambyo ang Iyang iglesia, nag-ingon, “Ako kinahanglan magakunhod, Siya kinahanglan magatubo, tungud kay,” siya miingon, “Ako usa lamang ka tingog Niya, nga nagasinggit sa kamingawan, ‘andama ang dalan alang sa Ginoo.’” Ug si Jesus miabot sa samang pagkaagi. Giandam ang pinili sa pagpaminaw sa tingog sa Dios, kana mao kong unsa ang ilhanan ingon sa tagna. Oh, kong inyong sundon kining mga mensahe, iandam ang- . . . iandam ang pinili. Dili ang uban, dili gayud maminaw niini. Ang mga pinili mao ang gitawag.

<sup>72</sup> Asa man ang katong Manolunda niadtto, sa Sodoma, nga naghimo niadtong ilhanan? Ngadto kang Abraham ug sa iyang pundok. “Pahilayo gikan sa Sodoma; kini pagasunogon!” Kita n’yo? Si Jesus nagsaad kini nga mahitabo usab, nasayud na mo, usab, sa kaning Sodoma. Karon himatikdi.

<sup>73</sup> Unsa may ginabuhat niini? Kini ginaandam ang pinili alang sa silonganan sa Dios, sama sa panahon ni Noe, ug uban pa.

<sup>74</sup> Ug unsa may ginabuhat niini? Kini nagahukom sa manggialamon nga dili magtotoo, ngadto sa pagkahinukman. Kani mao gayod sa kanunay. Pag-isalikway ang kaluoy, wala nay lain pang nahibilin kondili paghukom. Busa kini nagagahin sa makinaadmanon ug dili magtotoo andam alang sa pagkahinukman. Tungod kay, unsay ilang ginabuhat? Ilang gihukman kini.

<sup>75</sup> Mao kana ang hinungdan nga ang mga Judio gikaon ang ilang kaugalingong unod. Mao kana ang hinungdan nga ang dugo mibanaw sa tibuok ciudad sa diha si Titus, ang bantugang Romanhong heneral, misulong didto, tungud kay ilang gisalikway ang Espiritu Santo. Ang paghukom angay

moabot gayud tungod kay ilang gihimong kataw-anan Kini. Gisuginlan sila ni Jesus, sa diha ilang gitawag Siya nga Beelzebub, nga Siya miingon, “Gipasaylo Ko kamo,” ang pagtabon sa sala wala pa man mahitabo, “apan,” giingon, “kon ang Espiritu Santo moabot aron pagbuhat sa samang butang, ang pagsulti batok Niini dili na gayud pasayloon.” Ug kadtong maong kaliwatana dili na gayud gipasaylo pa niini. Husto kana.

<sup>76</sup> Hukom alang sa dili magtotoo! Kini gibutang didto alang sa nianang katuyoan, aron paghatag kahayag alang sa magtotoo, ug kangitngit alang sa dili magtotoo. Maingon sa haligi nga Kalayo; Kini naghimo’g kahayag, alang sa paglabang ngadto sa yutang saad, ug kangitngit kanila nga wala motoo. Ang mga ilhanan nga iya sa Dios kanunay’ng ingon niana, nagpalong sa mga mata sa mga dili magtotoo, ug nagahatag igtatan-aw ug kahayag sa paglakaw sa magtotoo. Mao kana kong para sa unsa Kini gipadala.

<sup>77</sup> Kong ang iyang propesiya tinuod, kon ang propesiya sa propeta tinuod ug nagakahitabo, nan kini maoy pasidaan sa Dios. Karon diha sa Numeros 12:6, atong makita ang samang butang, ang Kasulatan.

<sup>78</sup> Ang Biblia gisulat pinaagi niining tawo. Karon kong atong basahon diha sa Ikaduhang Pedro 1:21, Kini nag-ingon, “Ang tawo sa kanhing panahon, minanduan sa Espiritu Santo, misulat sa Biblia.”

<sup>79</sup> Mao man usab diha sa mga Hebreohanon 1:1, diin atong gihisgotan sa miaging gabii, “Ang Dios, daghang nagkalainlaing kapanahonan ug sa daghang mga paagi misulti ngadto sa mga amahan pinaagi sa mga propeta, niining katapusang mga adlaw pinaagi kang Jesus Cristo, nga Iyang Anak.”

<sup>80</sup> Ang Haligi nga Kalayo, ang ilhanan; ang tingog . . . o ang-ang tingog mosulti. Ang Haligi nga Kalayo diha sa sampinit, maoy inilang tingog nga ang Dios nangandam na sa pagsulti.

<sup>81</sup> Matikdi sa pag-ayo karon, ayaw’g pakyasa kini. Sa dihang si Miriam mikatawa sa iyang igsoong lalaki, si Moises, ug siya usa ka babayeng manalagna sa dihang siya mikatawa ngadto kaniya, ug ang Dios nanaug diha nianang Haligi nga Kalayo, si Moises nahibalo nga ang Dios andam na nga mosulti. Kadto maoy usa ka ilhanan. Ug ang tingog nga nagsunod niini, miingon, “Wala ba kamo mahadlok sa Dios?” Miingon, “Wala nay lain dinhi sa yuta nga sama sa Akong alagad, si Moises.”

<sup>82</sup> Gihimo sa gihapon sa diha sila nagtindug ug nag-ingon anaay . . . Sa dihang mitindug si Datan, ug sa diha si Core, sa iyang pagsupak, “Anaay labi pang balaang tawo kay kanimo. Nagdahum ka ba nga ikaw ray bugtong usa dinhi sa panon.” Gitagana sa Dios si Moises alang nianang bulohaton!

<sup>83</sup> Ug sa diha ilang gitinguha magkuha ug laing pundok aron mouban kanila, magbuhat alang kanila ug usa ka organisasyon,

Siya miingon, “Ipahalayo ang imong kaugalingon gikan kanila. Ako na lang sila hukman. Ako na lang sila pagaut-uton,” ug Iyang gibuhat. Gilamoy sila sa yuta.

<sup>84</sup> Karon atong nakita nga mao kana sa kanunay ang pamaagi sa Dios. Ang Haligi nga Kalayo nagpaila nga ang Tingog nangandam na sa pagsulti. Oh, Texas, Unsa man ka kabuta? Nahinumduman mo pa ba ang Houston. Karon atuay Tingog nasunod sa ilhanan.

<sup>85</sup> Si Moises, ang propetang ilhanan sa Israel, gisaad nga ang Pulong andam na nga paluyohan.

<sup>86</sup> Unsa ka hingpit ang Pulong sa Dios, sa kahapsay, sa matag panahon! Tukma nga sama sa Urim Tumim, ingon sa akong gisulti, sa miaging gabii. Ang Urim Tumim diha niana, ug hangtud nga kanang ilhanan mitukma nianang Urim Tumim, ang tingog wala maila. Kinahanglan anaa ang ilhanan. Ang ilhanan nagapaluyo sa tingog. Ug ang tingog nagapaluyo sa ilhanan, nga kini nagagikan sa Dios. Ang tingog sa ilhanan maoy nagasulti “oo” o “dili.” Kong ang Dios mosalikway niini, nan ang Tingog nagasulti nga “dili.” Kon ang ilhanan diha niana, ang Dios misulti nga “oo.” Ang pamaagi sa Dios dili gayud nag-usab. Kita mahimong mopabilin pipila ka oras alang niana, apan kini dili gayud nagbalhin.

<sup>87</sup> Tan-awa, si Jonas nga propeta, tan-awa kanang ilhanan. Siya nianang iyang dalan padulong sa Tarsus. Misugod sa pag-adto sa Nineve, ug gipili ug usa-usa ka dalan padulong sa Tarsus. Daghan ang nanghukom kang Jonas. Si Jonas dili angayan nga pagahukman. Siya usa ka propeta. “Ang lakang sa matarung gitukod sa Ginoo,” ug misugod siya sa iyang dalan padulong sa Tarsus. Ug atong gitinguha ang pagpanghimaraut sa tawo, apan si Jesus dili.

<sup>88</sup> Matikdi, Siya miingon, “Maingon nga si Jonas diha sa sulod sa tiyan sa balyena, tulo ka adlaw ug tulo ka gabii,” kadto mahimong usa ka ilhanan, “sa ingon kinahanglan ang Anak sa tawo maanaa sa ilalum sa yuta, tulo ka adlaw ug mga gabii. Ug ang dautan ug mananapaw nga kaliwatan nagapangita ug usa ka ilhanan, ug walay laing ilhanan nga gihatag kanila gikan sa Dios, hinumdumi, kondili ang ilhanan kang Jonas.” Unsa may ilhanan ni Jonas? Ang pagkabanhaw. Ug kini mao kadtong kaliwatan sa Sodoma, mananapaw, espirituhanong panapaw, nak-. . . nakahimo’g espirituhanong pakighilawas batok sa Kamatuoran sa Dios, gihimong katawanan Kini. “Usa ka dautan ug usa ka mananapaw nga kaliwatan magapangita sa usa ka ilhanan, ug ilang maangkon kini, kini mao ang ilhanan sa pagkabanhaw.” Tan-awa, si Jonas. . .

<sup>89</sup> Silang mga katawhan mga pagano, ug kadto maoy usa ka dakung. . . Kadto maoy usa ka ciudad sa pagpamatigayon. Ang dakung kapanginabuhian mao ang isda. Sila nagpadala ug isda

sa tibuok nasud. Ang kalalakin-an mga mangingisda. Mao kadto ang pangita. Ug sila mga pagano nang daan, sila nagsimba sa mga mananap ug mga diosdios, ug nahimong dautan kaayo.

<sup>90</sup> Sama niining nasud karon, napuno sa sex ug Hollywood, ug ang tanan matang, bisan sulod sa mga kasimbahanan. Ug matikdi kong unsay nagakahitabo. Uy, usahay bisan ang sex appeal sa sulod sa simbahan ginatawag nga moderno. Unsaon man niining nasud sa pagbarug ilalum sa ingon nga butang nga sama niana? Magatawag sa inyong kaugalingon nga mga Kristohanon, ug gabuhat nianang maong mga butang nga sama niana, unsaon man kini makabarug?

<sup>91</sup> Maingon sa akong maayong higala, nga si Jack Moore, miingon, sa milabay'ng mga katuigan, "Kong tugutan sa Dios kining nasud sa pagpasagad niini, Siya ubligado, ingon nga usa ka makatarunganong Dios, sa pagbangon sa Sodoma ug Gomora, ug mangayog pasaylo kanila tungod sa pagsunog kanila."

<sup>92</sup> Kamo'y paingon na ngadto sa pagkahinukman. Wala nay laing paagi nga dawaton kini. Isulat kini diha sa inyong mga Biblia. Ako nagakatigulang na. Tan-awa ninyo kong dili ba kini pagahukman. Kong ako mabuhi man sa kasagarang kinabuhi, akong makita kini, kasagarang panahon. Dugang pipila ka tuig mamahinog na kini.

<sup>93</sup> Si Jonas. Silang tanan nagapangisda, mga oras sa kaudtohon, ug ania karon ang dios sa kadagatan, mitungha, ang balyena, milangoy hangtud sa daplin ug giluya ang propeta didto sa daplin. Unsang ilhanan!

<sup>94</sup> Gihatud sa Dios ang Iyang propeta, dala ang usa ka mensahe. Karon ilang nakita ang ilhanan, sila mitoo sa ilhanan, karon unsa ang mensahe? "Paghinulsol!" Mao kadto ang tingog sa ilhanan. Ang tingog sa ilhanan mao ang, "Paghinulsol, o sulod sa kap-atan ka adlaw kamong tanan malaglag." Sila nahibalo pag-ayo sa paghinulsol.

<sup>95</sup> Si Jesus nag-ingon, "Ilang hukman kining kaliwatan, kay naghinulsol sila sa wali ni Jonas; ang labi pang daku kay kang Jonas ania karon."

<sup>96</sup> Ang tingog mao, "Paghinulsol, o sulod sa kap-atan ka adlaw kamo pagalaglagon."

<sup>97</sup> Si Juan nga propeta, mitungha, usa ka ilhanang propetang mitungha, human sa upat ka gatus ka mga katuigan nga walay propeta. Anaa kanila ang tanan mga manggialamon. Mapamalandong ko lamang kong unsa ang kagulyang diha kanila! Upat ka gatus ka mga katuigan, walay propeta, apan ang panahon nagkahiduol nga ang Mesiyas moabot. Karon, si Juan mao ang ilhanan, ingon nga usa ka propeta, nga ang Mesiyas andam na sa pagpamulong, ang tingog sa ilhanan; tungod kay, diha sa Malaquias 3, atong makita, "Akong ipadala ang Akong mensahero sa Akong atubangan." Si Elias magaabot diha sa

Iyang atubangan, ug si Elias miabot. Si Juan, diha sa espiritu ug gahum ni Elias, miabot ug sa tukma gayud nagbuhat kong unsay ingon sa mga Kasulatan, ug wala sila makasabot niini. Ang Kasulatan nagsulti nga ingon. Siya mao ang ilhanan, usa ka ilhanang propeta, nga ang Mesiyas magasulti na.

<sup>98</sup> Kadtong maong propeta, nga nahibalo kaayo niini, hangtud nga siya miingon, “Tinuod, anaay Usa nga nagatindog sa inyong taliwala, mismo karon. Kanang Mesiyas nga akong gihisgotan, anaa sa inyong taliwala. Dili ako takus sa pagtangtang sa Iyang mga sapin. Siya maoy Bugtong magabautismo sa Espiritu Santo ug Kalayo. Ako nagabautismo uban sa tubig, ngadto sa paghinulsol, apan Siya sunod human kanako. Anaa na Siya sa inyong taliwala karon.”

<sup>99</sup> Usa ka adlaw iyang nakita ang usa ka batan-ong Lalaki nga nagsingabot, nagalakaw. Iyang nakita kadtong Haligi nga Kalayo, diha sa dagway sa usa ka Salampati, nga mikunsad gikan sa Langit; usa ka Tingog, naga-ingon, “Kini mao ang Akong Anak nga pinalangga, na Kaniya nalipay Ako pagpuyo.” Miingon, “Nga Kaniya nalipay Ako sa pagpuyo,” kini maoy usa lamang ka berbo nga gisundan sa adberbyo, ngani kini managsama ra. “Diha Kaniya nalipay Ako sa pagpuyo,” o, “diha Kaniya nalipay Ako sa pagpuyo,” walay kalainan. Matikdi, “Ako nalipay sa pagpuyo Kaniya.”

<sup>100</sup> Si Juan miingon, “Ako saksi nga Siya nga misulti kanako sa kamingawan,” dili sa seminaryo, “sa kamingawan, nag-ingon, ‘Siya nga imong makita ang Espiritu nga magakunsad, ug magapuyo,’ amen, ‘Siya ang Bugtong nga magabautismo diha sa Espiritu Santo ug Kalayo.’ Ug ako saksi nga kini mao ang Kamatuoran.”

<sup>101</sup> Unsa man kadto? Kadtong propeta maoy ilhanan nga ang Mesiyas andam na nga mosulti.

<sup>102</sup> Unsa man ang Mesiyas? Ang Mesiyas mao ang Pulong, diha sa kahupnganan. Siya mao ang kahupnganan sa Dios. Ang mga propeta maoy magagmay’ng naga-kipatkipat nga Kahayang. Apan diha Kaniya anaa ang tanang Kahayang, diha niining maong Mesiyas, kay Siya mao ang nadayag nga Dios, nahimong Emmanuel, ang Dios uban kanato sa tawhanong unod.

<sup>103</sup> Ang Mesiyas andam na sa pagsulti. Ug matikdi, ang Biblia nag-ingon, nga, “Ang Pulong sa Ginoo nagaabot sa propeta.”

<sup>104</sup> Karon ania nagtindog si Juan, nga giingon ni Jesus nga mao “ang labing dakung propeta nga natawo.” Si Jesus ang namulong sa ingon, diha sa Mateo capitulo 11, “Unsa man ang inyong giadto aron tan-awon, ang usa ka tawo nga gikusokuso sa matag hangin, *kinig* denominasyon ga-ingon, ‘Hatagan ko pa ikaw ug dugang; imo himoon *kini*’? Dili si Juan! Dili, dili. Ang tawo nga mahimo rang tukmod-tukmoron, hadlukon? Dili, siya maoy usa ka kusganon, maisogon nga propeta. Nag-adto ba kamo sa



pagtan-aw sa usa ka tawo nga binistihan tanan sa nga bisti sa pagkasacerdote?” Ug Siya miingon, “Dili, sila nanagpuyo sa mga palasyo sa mga hari. Ilang ginaminyo ang mga batan-on, mohalok sa mga kabataan, ug ginalubong ang mga tigulang. Mao kana nga matang. Walay ilang hibangkaagan mahitungod sa duha ka pulohan nga Espada. Busa unsa may inyong giadto aron tan-awon, usa ka propeta?” Siya miingon, “Labaw pa sa usa ka propeta!” Siyempre, siya mao ang mensahero sa Pakigsaad, maoy gisaad sa Dios nga ipadala siya.

<sup>105</sup> Ug matikdi dinhi, si Juan nagatindog sa tubig, nagapamautismo, naga-ingon, “Siya nagaabot na.”

<sup>106</sup> Ug ania karon ang Pulong, dili na sa Langit, kondili nahimong unod. Ang Pulong mao ang unod, nan unsa may nahitabo niini? Unsa may han-ay sa Kasulatan sa Dios? Ang Pulong nag-abot ngadto sa propeta, mismo sa kamingawan, mismo didto sa linaw. Ang Pulong nag-abot sa propeta.

<sup>107</sup> Si Juan mihangad, ug siya miingon, “Ako nagkinahanglan nga Imo bautismohan.”

<sup>108</sup> Ug ang akong minahal, karaang igsoong lalaki, si Doctor Davis, sa Missionary Baptist church, nga nagbautismo kanako diha sa Kristohanong pagtoo, kong ania siya dinhi niining gabhiona, dili ko tuyo mapahiubos ang iyang pagbati. Kay, ania siya nagapuyo sa Texas, dinhi sa Davis Mountains. Apan akong nahinumduman kami naglantugi niana usa ka adlaw, ug ako usa pa lamang ka batan-on. Ug matud ko, “Murag dili kini ensakto, Doctor Davis.”

<sup>109</sup> Siya miingon, “Ang nahitabo, nga gibautismohan kadto ni Jesus si Juan, ug unya gibautismohan ni Juan si Jesus, tungod kay si Juan wala pa man hibautismohi.” Daw dili kini husto alang kanako.

<sup>110</sup> Ako nagpadayon sa pagpaabot, nagabantay, nagapangutana. Wala akoy masulti bisan unsa mahitungod niini, apan usa ka adlaw sa diha nga ang Ginoo gipadayag kini.

<sup>111</sup> Karon bantayi kong unsay giingon ni Jesus. Si Juan miingon, “Ako ang angay nga Imong bautismohan, ug nganong mianhi Ka kanako?”

<sup>112</sup> Si Jesus miingon, “Itugot lang kini karon, kay angay kanato ang pagbuhat niini aron pagtuman sa tibuok pagkamatarung.”

<sup>113</sup> Si Juan nahibalo kong Kinsa kadto Siya. Ania ang duha ka mga pangulo sa kalibutan, duha ka pangulo sa iglesia, ang Dios ug ang Iyang propeta, nga nagatindog dungan. Karon, bantayi, angay lang nga sila nahibalo.

<sup>114</sup> Si Jesus miingon, “Itugot lang kana karon, mao kanay ensakto, apan mao kini aron atong tumanon ang tibuok pagkamatarung, ang gisaad nga Pulong.”

115 Ang Halad kinahanglan nga hugasan sa dili pa kini igatugyan. Si Juan gibautismohan si Jesus tungud kay Siya mao ang Halad. Kita n'yo? Ang halad kinahanglan nga hugasan sa dili pa igatugyan. Miadto mismo didto, ug ang Halad nahugasan, ug dayon Siya gihalad sa husto. Siya miingon, "Mao kana ang Cordero sa Dios."

116 Mihaw-as Siya gilayon sa pangpang, ug ania karon ang Espiritu sa Dios mikunsad diha Kaniya, miingon, "Kini mao ang Akong pinalanggang Anak." Kita n'yo, Siya gipaila kaniadto sa kadaghanan. Apan sa dili pa ang Halad maitugyan, kinahanglan nga kini pagahugasan una; mao kana ang balaod sa Daang Tugon. Buweno.

117 Ang Mesiyas andam na sa pagsulti, tungud kay ania na ang ilhanan sa propeta. Ug sa dihang ilang nakita kanang propeta nga migula na sa eksena, human niadtong upat ka gatus ka katuigan nga walay usa, sila nahibalo, ang sunod nga tingog mao na ang Mesiyas.

118 Karon kamong mga magbabasa sa Biblia pamalandunga pag-ayo sa pipila ka mga gutlo. Nga magbantay sa iyang kinaiyahan, giunsa nila siya sa pagsipyat? Kun giunsa nila pagkasipyat sa pagkasayud nga mao na kadto siya, si Juan? Ang iyang kinaiyahan nagpaila, ang iyang espiritu ug kinaiyahan nagpaila nga mao si Elias. Karon matikdi kong unsang espirituha. Karon, siya mao si Juan Bautista, apan ang espiritu ni Elias ang anaa kaniya.

119 Matikdi, una, si Elias mao ang usa ka tawo nga nahigugma sa kamingawan. Kita n'yo? Ug si Juan mao ang tawo sa kamingawan.

120 Ug si Elias maoy usa ka tawo nga misaway nianang pamaagi sa organisasyon, niadtong adlaw, kutob sa anaa kaniya. Maingon man usab si Juan, "Kamong mga kaliwat sa mga bitin. Kinsay nagpasidaan kaninyo sa pakalagiw gikan sa kapungot? Ayaw kamo'g sugod pag-ingon, 'Ako aduna *niini*, *niana*, o ang *uban* pa.' Ang Dios makahimo niining mga bato sa pagpatindog ug mga anak alang kang Abraham." Nakita ninyo ang duha ka mga kinaiyahan?

121 Ug tan-awa si Elias, iyang gisaway silang tanan nga mga Jezebel nga nagpamintal sa ilang nawong sa iyang panahon, silang mga dauta'g dungog nga kababayen-an. Unsa may gibuhat ni Juan? Mao rang butanga, ngadto kang Herodias. Silang duha, maoy hinungdan sa ilang kamatayon.

122 Tan-awa si Elias, human niyang nabuhat niadtong dakung bulohaton, nahimo siyang masulub-on, naluya didto ug nag-ampo sa Dios nga kuhaon na siya. Si Juan nagbuhat sama niana, naluya didto ug gipadala ang iyang mga tinun-an didto, nag-ingon, "Lakaw pangutan-a Siya. Mao na ba Siya ang Usa o magpaabot pa kami'g lain?" Si Jesus nahibalo niana.

123 Siya mao si Elias. Ingon niana gayod ang iyang kinaiyahan. Siya nailhan sa tukma nga susama gayod ni Elias. Siya diha sa espiritu ni Elias.

124 Motungha sa lima ka higayon, kanang maong espiritu, nga pagagamiton: Si Elias, si Eliseo, si Juan, ug Malaquias 4, ug unya alang sa mga Judio. Ang katapusang mga adlaw, sa diin kita ania niining gabhiona, ang espiritu ni Elias. Matikdi karon.

125 Karon, buot kong ipakita kaninyo ang atong modernong mga propeta ni Ahab karon, gitugotan ang ilang mga Jezebel sa pagpapatul sa ilang mga buhok, magpintal sa ilang nawong, magsul-ob sa mga purol, manigarilyo, ug bisan unsa pang butang, “Kini gitugot lang.” Ang atong-atong Ahab nga mga propeta karon, nga minunot sa ilang mga tulonghaan, tinuod, nagaagak kanila pinaagi sa mga credo nga gihimo sa tawo ug mga denominasyon. Unsa man kini? Mga propeta ni Ahab.

126 Atong gikinahanglan ang usa pang Miquias nga motungha sa eksena. O sa panahon ni Ahab, si Elias mitungha sa eksena. Kadto mao, ang gisaad.

127 Nagatultol kanila, sa bisan asang dalanon nga gusto nilang mopaingon. Kong mosupak sila, isalikway sila niini bisan diin, sila’y mogawas ug moipon *niini* ug sa gihapon ipadayon ang ilang-ilang-ilang pagpatoong Kristohanon.

128 Bueno, wala gayud sila maluwas, sukad pa sa sinugdan. Ang ila mismong kinaiyahan nagapamatuod niini. Makahimo ka ba sa pagpupo ug mga ubas sa usa ka kahoy’ng tunukon? Makapupo ka ba ug mga sandiya gikan sa usa ka balagon nga kundol? Ang mismong kinaiyahan nagapakita nga wala nila kinahanglana ang Pulong. Ilang gihimong kataw-anan Kini, ug pasipalahan Kini. Samtang kini nahisulat, “MAO KINI ANG GIINGON SA GINOO, kining mga butanga magakahitabo,” ug ilang gikatawan Kini, gihimong kataw-anan Kini.

129 Dili katingala nga giingon ni Jesus, “Ang rayna sa Habagatan mobangon uban niining kaliwatana, sa katapusang mga adlaw, ug magahukom niini sa silot; kay siya mianhi gikan sa kinatumyan sa yuta, aron sa pagpakigkita sa usa ka tawo nga may gasa sa kaalam.” Siya miingon, “Ania dinhi karon ang labaw pa kay kang Solomon.” Tinuod. Si Solomon mao, ang iyang adlaw, maoy usa sa labing dakung mga adlaw. Ang tanang katawhan mituo niining gasa nga gihatag sa Dios kanila, kining maong Solomon, ug ang iyang-iyang kabantug mikuyanap sa bisan asa. Unsa kaha kong kitang mga katawhan niining adlawa . . .

130 Ug kitang mga Americano, sa gihapon kita naninguha sa pagpangita ug pipila ka mga laraw batok sa komunista. *Aniay* programa sa Dios, “Paghinulsol! Balik sa Dios!” Pipila ka programa? Kong mohimo lamang sila Niana, atong mahikalimtan ang komunismo.

<sup>131</sup> Sa dihang gitooohan sa tibuok Israel kadtong gasa nga gihatag sa Dios kanila. Kon ang America mohatag pa lamang sa...motoo sa gasa nga gihatag sa Dios kanato, niining katapusang mga adlaw, ang Iyang Anak, sa porma sa Espiritu Santo, nga nabanhaw gikan sa mga minatay, nga nagapuyo sa atong taliwala sumala sa Iyang gisaad. Kon atong mahalon lamang Kana!

<sup>132</sup> Kini moadto lamang sa mga Pinili. “Kay walay makahimo sa pag-ari Kanako gawas lamang kon Siya pagadanihon sa Amahan. Ug ang tanan nga gihatag Kanako sa Amahan, moduol gayud sila.” Ginapugas lamang ang binhi; kini nagakahulog, ang uban *niining* dapita ug *nianang* dapita, apan anaay pagpugas sa binhi, bisan pa niana. Kini manggamut bisan diin kini mahulog. Saluon nila kini.

<sup>133</sup> Matikdi, dinhi ania sila, ug atong makita nga niadtong adlaw, si Ahab, ang nasud nagpasagad kanilang mga Israelinhon sa bisan unsang matang sa butang nga gusto nilang pagabuhaton, ug sa gihapon nagapatawag nga sila mga Israelinhon.

<sup>134</sup> Giunsa niadto ni Elias ang pagsaway sa niadtong kaliwatan, sa tanan nga diha kaniya, ug ang Dios nagpanghimatuod kaniya. Ug siya usa ka propeta.

<sup>135</sup> Sa wala pa ang pag-abot, ingon usab si Juan! Mitungas ngadto mismo sa Israel...Nakigminyo kining babaye kang-kang Hero-...kang Herodes, ang asawa sa iyang igsoon nga si Felipe. Milakaw ngadto mismo sa iyang atubangan; wala siya’y ginasibugan. Wala siya mahadlok sa pipila ka mga anciano nga mopalagpot kaniya. Siya walay gidalang kard alang sa pagpakighiusa; uban lamang ang Dios. Siya ang Iyang propeta. Ang Pulong uban Kaniya. Siya dili na kinahanglan mananghid kang bisan kinsang obispo o mga deacono. Siya dinihogan. Anaa kaniya ang Pulong. Milakaw siya ngadto gayud sa iyang atubangan, ug miingon, “Dili uyon sa balaod alang kanimo ang paghupot kaniya!” Husto. Siya walay ginasibugan, ngadto kang bisan kinsa.

Silang mga dautang mga babaye nga nagapanapaw, nga nagapadayon!

<sup>136</sup> Sama kang Amos, sa dihang mitungha siya sa eksena, mitan-aw didto. Wala gani kita mahibalo kon diin siya gikan. Na, giunsa siguro niya pagtan-aw adtong ciudad sa Samaria! Sama sa mga turista, ang tanan matahum, ug ang mga magwawali anaay panagkahiusa uban sa-sa mga kanasuran, ug ang kapunongan uban sa mga kanasuran ug ang matag usa, ug sa gihapon nagkinabuhi sa sala! Ang iyang mga mata mihiktin, ang iyang ulong opaw misinaw, ug mao nga milugsong siya. Dili siya...dili maayo kaayong tan-awon, apan anaa kaniya ang MAO KINI ANG GIINGON SA GINOO.

137 Atong gikinahanglan ang usa ka Amos sa eksena karon. Dawaton ba nato siya? Sa tun-hay dili, labaw na sa iyang gihimo. Siya moabot sa eksena, iyang lumpagon ang matag organisasyon, ang matag denominasyon, ang matag babaye nga nagsul-ob ug purol, ang matag pugdol ug buhok nga Jezebel. Iyang kuniskunison sila pagpino. Ilang palagpoton siya diha sa dalan, ug moingon, “Kanang panatikong tigulang!” Apan anaa kaniya ang MAO KINI ANG GIINGON SA GINOO, kay kini nahisulat lamang nianang paagi. Ang denominasyon modawat ba kaniya? Dili.

138 Siya walay bisan kinsa nga mopaluyo sa iyang programa. Kini bang bantugan, maayong ciudad sa-sa pangibog, sama kanhi sa Samaria, modawat kaha sila niining gamay’ng wala hiilhi nga tawo nga walay kard sa pagpakighiusa, walay si bisan kinsa nga mopaluyo kaniya, o sa unsang butang? Walay iyang bisan unsang pagkapinaluyohan. Wala siyay bisan unsang kard alang sa pagpakighiusa, walay tulonghaan nga iyang gigikanan. Apan kaniya anaa ang MAO KINI ANG GIINGON SA GINOO. Ug ang iyang pag-abot, ingon nga propeta, maoy usa ka ilhanan. Ang iyang tingog nagagikan sa Dios, ug kadto giila sa mga adlaw ni Jeroboam nga Ikaduha. Ang bisan unsay iyang giingon nahitabo.

139 Karon atong nakita, niining adlaw nga atong gipuy-an, maoy pagsubli lamang niana pag-usab. Mga ministro ug katawhan, maulaw nga motindog diha sa pulpito, ug ang-ang Maayong Balita nahimong usa ka panginabuhi alang kanila. Sila mahadlok sa pagsulti ug bisan unsang butang, may mga tawo mopalagpot kanila gikan *niini*, *niana*, o sa *uban* pa.

140 Adunay usa lamang ka Tawo ang makahimo sa pagpalagpot kanimo sa Langit, kana mao ang Dios. Ug unsaon ka mapalagpot sa Langit, kon nagpabilin ka sa Iyang Pulong? Mao kana ang katuyoan sa Iyang pagpadala kanimo.

141 Hinumdumi, ang Biblia nag-ingon, sa in-anang panahon sama kadtong mga adlaw ni Elias, sa in-anang adlaw sama kadtong mga adlaw ni Juan, nga ang Malaquias 4 mobalik dinhi sa kalibutan pag-usab. “Akong ipadala si Elias.”

142 Karon ayaw’g isambog kana kauban sa Malaquias 3, “Akong gipadala ang Akong mensahero sa Akong atubangan.” Kato mao si Elias, usab.

143 Apan sa Malaquias 4, Siya nag-ingon, “Sa dili pa moabot ang makalilisang nga Adlaw sa Ginoo, sa dihang ang tibukok nga kalibutan masunog sama sa hudno, ug ang matarung magatamak sa ibabaw sa mga abo sa mga dautan,” mao kana ang Milenyum, “Akong ipadala si Elias ang propeta.” Ug unsa may iyang pagabuhaton? “Iyang pabalikon ang pagtoo sa mga anak ngadto sa mga amahang apostolikanhon,” balik sa Pulong. Siya kinahanglan mahimo nga usa ka propeta. “Akong ipadala siya.”

Siya sa tataw gayud maila. Ang iyang kinaiya managsama kanhi kang Elias, sa tukma. Ang iyang Mensahe uyon gayud nianang linya. Siya mangsaway, manglumpag. Walay pakighiusa, walay pakig-uyonay, wala bisan unsa, apan kaniya maanaa ang MAO KINI ANG GIINGON SA GINOO.

<sup>144</sup> Karon, hinumdumi, aduna nay tanang matang sa mga pundok ang mitindog ug miingon, “Mao *kini* ang kupo sa Elias, ug mao *kini* ang doctrina sa Elias.” Ang tibuok pundok, usa ka organisasyon, nahimong pundok ni Elias, o sa kupo ni Elias. Kana dili mao ang Kasulatan. Ang Dios sukad pa dili gayud nakigsabot sa usa ka pundok nga sama niana.

<sup>145</sup> Sa diha si Elias miabot sa eksena, ug si Juan Bautista, silang duha mitunglo sa mga pundok ug sa organisasyon. Wala gayud sila mouyon. Iyang gihukman sila, sa pamaagi nga ilang gibuhat; si Elias ug si Juan, silang duha. Dili usa ka pundok o denominasyon. Kondili sila, diha sa ilang mga panahon, gitunglo ang mga pundok ug sa mga organisasyon.

<sup>146</sup> Nan unsa man? Ang ilhanan sa katapusang panahon sa tinud-anay magauban sa Tingog sa katapusang panahon. Si Elias gituohan nga moabot diha sa eksena, tawo nga dinihogan nianang espiritu; usa ka tawong lasangnon, ug uban pa, ug mahigugmaon niana, ug motungha sa eksena aron sa pagpamatuod. Karon bantayi kong unsay giingon sa Kasulatan karon, ug niana dili kamo malimbungan, kita n’yo, ang ilhanan sa katapusang panahon ug ang Tingog sa katapusang panahon.

<sup>147</sup> Ang Dios bisan kanus-a dili gayud nakigsabot sa usa ka pundok, wala bisan diin sa Kasulatan. Siya nakigsabot sa tagsa-tagsa, tungod kay ang matag tawo lahi sa usag-usa. Ang matag tawo, ang atong mga kumagko managlahi, ang atong mga ilong managlahi, ang atong linihokan managlahi. Iyang pilion ang usa ka tawo, Iyang mahimo siya sa hingpit nga panag-uyon hangtud nga siya mahimong nianang Pulong.

<sup>148</sup> Mao kana ang hinungdan nga si Pablo, miingon siya, “Aron ako dili makapasulabi sa pagkahimuot tungod sa kadaghan sa pinadayag kanako, gihatagan ako ug usa ka pinadala ni Satan.” Kita n’yo? Si Mateo nagsulat, si Lucas nagsulat, si Marcos nagsulat, silang tanan, apan, misunod lamang sila kang Jesus ug gisulat kong unsa Iyang gisulti. Apan si Pablo adunay pinadayag kong Kinsa Siya, kita n’yo, mao kana ang butang nga iyang-iyang nakita. Ang pinadayag kaniya daku kaayo, Iyang gitugotan siya sa pagsulat sa Biblia, sama kang Moises sa Daang Tugon. Kanang halangdong tawo, si Pablo, niadtong pinadayag nga iyang naangkon, siya nasayud nga si Jesus sa Bag-ong Tugon mao si Jehova sa Daan. Siya adunay pinadayag Niini, ug makahimo niini sa pagpahimutang ngadto sa mga Hebreohanon, alang sa . . . ug usab ngadto-ngadto sa mga taga Roma, ug ngadto sa mga taga Efeso, ug-ug sa tanan. Iyang-iyang gisulat kining

mga sinulat. Matikdi, human ang iyang ilhanan nilabay, human niana iyang gisulat ang mga sinulat.

<sup>149</sup> Kining kinaiya sa pag-abot managsama sa gihapon. Kini dili mahimong usa ka pundok. Kini usa ka tawo. Ang Dios bisan kanus-a dili gayud nakigsabot sa bisan unsang pamaagi gawas sa usa ka tawo. Karon, katong si Elias dili usa ka pundok, katong si Juan Bautista dili usa ka pundok, sila binugtong nga tinagsa. Ang Dios, sa Malaquias 4, wala naga-ingon, “Akong ipadala usa ka pundok.” Miingon, “Akong ipadala si Elias!” Ang Pulong dili mahimong mausab.

<sup>150</sup> Karon, bantayi, ang ilhanan sa katapusang panahon ug ang Tingog moabot diha sa laray sa Kasulatan maingon nga kini gisaad.

<sup>151</sup> Atong buot hisayran kong unsa ang ilhanan sa katapusan? Si Jesus miingon kanato, diha sa Mateo 24 ug 25. Nagtug-an kanato, usab, diha sa Pinadayag, sa tanan gikan sa ika-6. . . o sa naha-una, hangtud ngadto sa, bueno, ika-10 nga capitulo. Unya mibalik Siya diha sa ika-19 nga capitulo, ang Milenyum mopahaluna na sa Iyang pag-abot, nagasakay sa puti nga kabayo.

<sup>152</sup> Kini moabot, ang ilhanan sa katapusang panahon. Karon paminaw, sa pagtapus. Kini moabot sa husto gayud sumala sa giingon sa Kasulatan. Karon matikdi ang Tingog sa ilhanan.

<sup>153</sup> Karon, si Jesus, diha sa Lucas 17:30, nagsaad sa ilhanan sa katapusang panahon. Ang katapusang ilhanan, ang Dios napadayag diha sa tawhonong lawas nga makahimo sa pag-ila sa mga salabutan nga diha sa hunahuna ni Sara, diha sa tolda sa iyang likuran. Mao kana kon unsa Iyang giingon. Mao kana ang ilhanan nga Iyang gisaad sa katapusan. Ju- . . . Unsay Iyang giingon nga buhaton niini? “Kini igapahibalo diha sa mga adlaw, sa katapusang mga adlaw, sa dihang ipadayag na ang Anak sa tawo.” Igapadayag! Sa dihang igapadayag na ang Anak sa tawo, mao kana ang ilhanan nga pinaagi niini Siya mapadayag. Karon tan-awa kong wala ba Kana mag-ingon niana. Sa pagkatinuod nag-ingon gayud.

<sup>154</sup> Karon makaingon kamo, nga, “Dili, kini usa ka lain pang butang. Dili, kini mahimong natukod nga usa ka dakung gambalay, usa ka dakung ingon *niini*, o *kini*, o pipila ka dakung hiniusang konseho, o pipila”? Oh, dili. Dili, halayo ra kaayo kana. Anaa ra kana sa pikas bahin. Kini supak sa unsay giingon sa Dios nga pagabuhaton, Iyang buhaton.

<sup>155</sup> Matikdi kong unsay atong gisulti karon. Ang mga Kasulatan husto gayud, tungod kay anaa nay atong ilhanan sa Sodoma, dinhi sa natural. Kanus-a man nga anaay daghang mga bayot, mga pagkabinalit-ad ug mga butang, maingon nga ania karon, “usa ka dautan ug mananapaw nga kaliwatan,” sa diha nga dili ka gani makaabli sa imong telebisyon basi’g anaay pipila

ka matang sa kahugawan, mahugaw nga Kalingawan nga mga butang? Ug ang mga katawhan, nagtawag sa ilang kaugalingon nga mga Cristohanon, magapabilin sa balay kaysa tigum alang sa pag-ampo aron motan-aw sa ingon. Kini nagpakita kong unsa nga espiritu ang anaa kaninyo. Husto. Ug ang mga kababayenan magbisti'g sama gayod niadto, ug ang lalaki magatugot kanila sa pagpangulo kanila diha sama sa ilang ginabuhat didto. Buhaton ba nato nga panag-ingnan ang Hollywood, o ato bang toohan ang Pulong sa Dios mahitungod niini?

<sup>156</sup> Ug kanang samang pundok makakita sa Pulong sa Dios nga gipaluyohan, ug unsa'y ilang gibuhat? Gikataw-an kini. Tungod kay, mga patay na sila, patay nga Dayon. Sila dili na mga buhi daan. Kong buhi pa sila daan, sa kanunay gayud silang buhi, ang Walay Katapusan. Apan sila'y dili man buhi daan. Sila patay na daan. Oh, mahimong sila gipatahum, ug mitoo *nini*, *niana*, o sa *lain*.

<sup>157</sup> Si Jesus miingon, “Kamong mga maut,” ngadto kanila, ngadto kanilang mga pari niadtong adlaw. “Unsaon man ninyo sa pagpakasulti ug maayong mga butang, samtang unsay kadagaya sa kasingkasing ang baba magasulti? Nagatawag Kanako nga maayo, ‘Maayong Magtutudlo, maayong Agalon?’” Siya nasayud kong unsa ang anaa sa ilang kasingkasing. Iyang maila kong unsa ang anaa sa ilang kasingkasing. Siya mao ang Pulong.

<sup>158</sup> Ang Biblia nag-ingon, “Ang Pulong sa Dios mahait pa kay sa espada nga duhay sulab, ug motugkad sa mga hunahuna nga anaa sa kasingkasing.”

<sup>159</sup> Karon, kadtong ilhanan sa Sodoma mibalik na, diha sa natural. Ug kon ang matag butang napahimutang na sa husto diha sa dapat niya nga kahimtang sa natural, nan unsaon mo man masalikway kini, gikan sa imong hunahuna, nga ang spirituhanon wala niini sa samang higayon? Ang duha ka kahimtang ania na sa eksena. Oo, ang tanan nagakaayon, husto ang natural; apan, oh, diha sa spirituhanon, dili sila gusto nga motoo niini, tungud kay makasamok Kini sa ilang mga doctrina.

<sup>160</sup> Ang Lucas 17 maoy ilhanan. Ang Lucas 17 maoy ilhanan nga si Jesus nag-ingon, nga, sa katapusang mga adlaw, ang mga kanasuran ug ang mga kasimbahanan ug mga katawhan mamahimong sama kanhi sa Sodoma, ang kalibutang Gentil, sa wala pa ang pagkasunog sa Sodoma. Ug maanaay usa ka pundok, murag, sama kang Abraham. Baliki, sa dihang si Jesus nag-ingon, “maingon kanhi sa mga adlaw sa Sodoma,” baliki ug tan-awa kong unsa kadtong sa Sodoma. Iyang gibasa ang mao ra nga Biblia nga atong gibasa, mao ra nga Biblia, karon baliki ug tan-awa kong unsa kadto.

<sup>161</sup> Dinhi ania ang piniling pundok, tinawag paggawas, ang pundok ni Abraham, sila nagpaabot sa gisaad nga anak. Ang



mga Sodomanhon wala motoo gayod mahitungod niini. Ug didto ang dagaang, ang sakop sa simbahan didto sa Sodoma. Tan-awa kadtong tulo ka mga Manolunda nga miabot ngadto sa matag usa kanila, bantayi kong unsay ilhanan nga ilang gipakita, unya inyong makita kong unsay mga ilhanan nga atong gikinabuhian.

<sup>162</sup> Karon, kana mao ang mamahimong ilhanan. Ug ang tingog sa ilhanan mao ang Malaquias 4, “aron ipasig-uli ang katawhan balik ngadto sa apostolikanhong Pagtoo sa mga amahan.” Mao na ang ilhanan, mao na ang Tingog, sa tukma nga subay sa Kasulatan. Kita n’yo? Ang ilhanan maoy ilhanan nga kini atua sa Sodoma, ang Dios nadayag diha sa tawhanong mga linalang.

Ug Siya miingon, “Hain man ang imong asawa, nga si Sarah?”

Mitubag, “Anaa siya sa sulod sa tolda, sa Imong likuran.”

<sup>163</sup> Miingon, “Ako moduaw kanimo sumala sa panahon nga Akong gisaad kanimo.” Ug miingon Siya . . .

<sup>164</sup> Ug si Sarah, sa likod, sa luyo Kaniya, miingon, “Unsaon man sa pagkahimo niana, ako nga usa ka tigulang babaye, siya nga usa ka tigulang lalaki? Ug sama sa akong bana didto sa gawas, usa ka tigulang nga lalaki,” miingon, “walay among sama niana dinhi kanamo.” Miingon, “Kini dili gayod mahitabo.”

<sup>165</sup> Siya miingon, “Nganong si Sara nagduhaduha man niana, nga miingon diha sa iyang kasingkasing, ‘Unsaon man sa pagkahimo niining mga butanga?’”

<sup>166</sup> Ug si Jesus miingon nga kana mobalik pag-usab. Karon, hinumdumi, si Abraham nagtawag niadtong Tawhana, “Elohim,” Dios. Siya nga Dios gayud kato. Ngano? Makahimo Siya sa pag-ila sa mga salabutan, ug Siya diha gayud sa tukmang panahon. Ug si Elohim, ang Espiritu Santo, (dili laing persona) mao ra nga Persona nga mibalik sa iglesia ug magabuhat sa samang butang, kana mao ang ilhanan. Ug ang Tingog maoy mamahimong, “Motawag kanila balik sa Pulong, ipasig-uli ang Pagtoo sa mga anak ngadto sa mga amahan.” Mao kana ang ilhanan ug ang Tingog.

<sup>167</sup> Ang mga ilhanan sa kasagaran ginadawat, apan ang Tingog dili. Dili sila moangay sa Tingog, apan ilang dawaton ang ilhanan. Kasagaran, ilang dawaton kini. Moangay sila sa ilhanan, kay nagustohan nila nga motan-aw niini, makalingaw kanila. Apan, ang Tingog, dili sila gusto nga-nga mobuhat niini. Hinumdumi karon ang Tingog.

<sup>168</sup> Balik sa Pulong pag-usab. Ang ilhanan nga Jesus sa Mesiyas, sumala sa Isaias 35, “Ang bakol molukso sama sa usa ka lagsaw,” ug kining tanan.

<sup>169</sup> “Makahibulongan kana!” Oh, ilang gidawat kana. Maayo kadto. Mitoo sila niana. Ilang gitooan ang ilhanan. “Dali ngari, Rabi, sa akong simbahan, tabangan ka namo sa hingpit. Tinuod,

kami nagatoo Kanimo. Ikaw mao ang kahibulongan. Ikaw mao ang Rabi. Ikaw mao ang batan-ong Propeta. Sulod ngari! Tanan matang sa pagtambayayong! Ang ilhanan kahibulongan.”

<sup>170</sup> Apan sa diha ang Tingog misulti na, ug miingon, “Ako ug ang Amahan Usa ra.”

<sup>171</sup> Ay, sus, dili sila makatoo Niana. “Ginahimo Nimo ang Imong kaugalingon nga Dios.” Wala nila gikinahanglan ang Tingog. Ilang nagustohan ang ilhanan. Nahibalo sila niana, ilang gidawat nga kadto maoy ilhanan sa Mesiyas, apan, ang Tingog, dili sila moangay Niana.

“Ang mga buhat nga Akong ginabuhat buhaton ninyo usab.”

Ug miingon sila, “Siya mao si Beelzebub.”

Siya miingon, “Kamong kaliwatan sa mga bitin.”

<sup>172</sup> Oh, ilang gikaligotgotan kanang maong Tingog. Unsa may ilang gibuhat? Ilang gipalagpot kadtong maong Tingog gikan sa ilang taliwala. Ilang gipalagpot Siya.

<sup>173</sup> Si Jesus miingon, “Kong ilang gihinganlan ang Agalon sa balay, ‘Beelzebub,’ unsa pa kaha ka labaw nga ilang tawgon ang Iyang mga tinun-an?”

<sup>174</sup> Hinumdumi, diha sa Pinadayag 3, diha sa Kapanahunan sa Laodicea. Kini mao na ang Laodicea; ang ilhanan sa Sodoma moabot. Ang Tingog, “Pauli balik sa Pulong, pagpahilayo gikan niining mga credo ug mga denominasyon, ug balik sa Pulong,” kong moabot na Kini, sumala sa Pinadayag 3, Siya gipagawas sa simbahan, sama sa nahitabo kaniadto.

<sup>175</sup> “Ang ilhanan maayo man, apan dili ang Tingog.” Wala silay arang mahimo diha sa Tingog. Dili, dili; sa Tingog. Apan si Moises miingon, kong dili man sila, o . . .

<sup>176</sup> Ang Dios miingon kang Moises, “Dili sila motoo nianang unang tingog sa unang ilhanan, sulayi sila diha sa ikaduhang tingog. Ug kon dili sila mobuhat niana, nan lakaw ug pagkuha’g tubig ug iyabo kini sa yuta.” Kana maoy sulbad niini. Mao lang kana. “Hugasi, ang abog-ang abog gikan sa imong tiil,” sa laing pagkasulti, sama sa giingon ni Jesus. Miingon, “Pagkuha ug tubig gikan sa suba, iyabo kini diha sa ibabaw sa yuta, nahimong dugo, ug gapakita nga kana maoy maghumud kaniya niini, ang dugo.” Busa mao kana ang tukma kong unsa kadto.

<sup>177</sup> Kong dili sila nagtoo sa ilhanan, nan ang ikatulong ilhanan maoy nakahimo niini. Ang tanan mga bulohaton adunay tutulo ka mga ilhanan, kon kini pinadala gikan sa Dios. Si Jesus may tutulo ka mga ilhanan. Si Moises may tutulo ka mga ilhanan. Si Noe may tutulo ka mga ilhanan. Si Elias may tutulo ka mga ilhanan. Ang tanan mga butang nagaabot sa tutulo ka mga ilhanan. Matikdi. Paminaw, mga higala.

178 Nagkaanam na sa paglangan ug diyotay. Anaay akong . . . Ay, na, wala ko nabantayan in-ani na kalangan, ikaupat ka bahin ang milabay.

179 Kon kamo mahimong motoo sa ilhanan sa Sodoma, ni Lucas, kita n'yo, maingon sa Iyang gisaad kini; kamo mitoo sa ilhanan sa Sodoma, nan nganong dili man kamo makadawat sa Tingog sa Malaquias nga nagasunod sa ilhanan, aron sa “pagbalik sa Pulong”? [Walay sulod diha sa teyp—Ed.] Ang Biblia nagasulti sa ingon, ug inyong nakita kini, nan paminawa ang Tingog sa ilhanan.

180 Kalagiw sa kapungot nga umalabot! Ayaw pagdahum, “Tungod kay nahisakop ako sa UPC, Assemblies of God, Methodist, Baptist, Presbyterian, anaay akong katungod sa pagsulod.” Ang Dios makahimo niining mga bato pagpatindog ug mga anak alang kang Abraham. Balik sa Pulong! Pagpahilayo gikan sa inyong pagkakalibutanon ug sa inyong mga pamaagi sa organisasyon, ug mga butang. Laglagon sila sa Dios gikan sa nawong sa yuta. Iyang i-unlod sila diha sa kinahiladman sa dagat sa kalimot, sama sa Iyang gibuhat sa Egipto sa dihang Iyang gitawag ang Israel, nasud nga gawas sa usa ka nasud. Sa dihang Iyang ginatawag ang Pangasaw-onon paggawas sa iglesia, siya mopaingon ngadto sa mga kasakitan, mobaganaw ang iyang dugo sa ibabaw sa yuta. Kalagiw sa kapungot nga umalabot, kay kini haduol na!

181 Dili mo mahimong makita kining mga butanga kong walay . . . ako wala masayud kong unsay inyong gihunahuna mahitungod kanila. Akong katungdanan lamang ang pagbasa kanila ug maghisgot mahitungod niini. Anaa ra kaninyo! Mahimo ninyo toohan ang ilhanan, unya toohan ang Tingog nga nagasunod sa ilhanan. Oh, sus!

182 Tan-awa, si Moises, ang panag-ingnan sa pagula karon. Siya ang magasulti niadtong katawhan mahitungod sa saad nga gikahatag ngadto sa mga amahan. “Akong nahinumduman ang Akong saad ngadto sa ilang mga amahan.” Ug karon unsay-unsay mabuhat ni Moises? Ipasig-uli ang mga kasingkasing sa katawhan balik ngadto sa unsay giingon sa mga amahan. Ug maingon nga si Moises mao man, maingon man usab si Malaquias 4, “aron pabalikon ang katawhan balik sa Pagtoo sa mga amahan.”

183 Tanan kining mga katahap sa mga denominasyon, ug uban pa, balik ngadto sa Pulong! Nahibalo ako kaninyo, ang kadaghanang mga tawo gusto nga mobuhat niana; Wala ako nangasaba lamang kaninyo dinhi. Kining mga teyp motadlas sa tibuok kalibutan, kita n'yo, bisan diin. Wala ako nangasaba kaninyo, kondili nangasaba ako ngadto kang bisan kinsa man, hain kini mahisakop. Ako usa ka magpupugas ug Binhi. Mao lamang kana ang akong nahibaloan nga pagabuhaton. Anaa

na kana kaninyo ang paghimo sa paghukom. Kalagiw gikan sa kapungot nga umalabot, katawhan!

<sup>184</sup> Ayaw pagdahum nga tungud kay ikaw usa ka Pentecostal. Ayaw pagdahum nga ang imong inahan maayo, balaan nga Methodistista, o ang imong amahan maayo, nagasiyagit nga Baptist. Ayaw pagdahum nga kana anaay butang mahimo diha kaninyo. Ayaw pagdahum nga ikaw sakop sa usa ka simbahan nga ilang gitukod, o sa simbahan nga inyong ginatukod karon. Ayaw pagdahum tungud kay kamong mga Pentecostal nagsulti'g mga dila ug nagsayaw diha sa Espiritu, ug modalagan nga magluksolukso sa mga salog, sa kap-atan nga katuigan nga milabay. Ayaw pagdahum tungud kay anaay imong mga tigum sa pagpang-ayo, ug sa uban pa.

<sup>185</sup> Ayaw'g pakyasa nga makita kanang ilhanan, sa usa ka Haligi nga Kalayo, nga gipaluyohan sa Dios; ug ang Tingog sa luyo Niini, aron sa pagpasig-uli ngadto, balik ngadto sa Dios. Ayaw'g itugot nga molabay Kini kanimo. Kana mao ang ilhanan ug ang Tingog.

<sup>186</sup> Sa diha ang usa ka tawo motungha nga dunay usa ka ilhanan, ang mao rang karaang panabot, anaay usa ka butang nga sayop, kini wala magagikan sa Dios. Ay, na! "Tul-ira ang Iyang mga agianan karon!" Karon, mitoo ba kamo niini? "Nan balik, O buta ug mga nahisalaag, sa inyoha." Ang Biblia . . . Ang magsusulat sa awit nag-ingon:

Mga nasud nabahin, ang Israel napukaw,  
Mga ilhanan nga ang Kasulatan nagtagna;  
Ang mga adlaw sa Gentil gitagalan, sa  
kasamok nabalda;  
"Balik, O kamong nasaag, sa inyoha."

<sup>187</sup> Balik! Pauli! Ang propeta nag-ingon, "Kini mahitabu nga ang Kahayag motungha sa panahon sa kagabhion." Sa dili pa ang Adlaw mosalop sa hingpit, kini mahitabu ang Kahayag. Lakaw diha sa Kahayag samtang may Kahayag. Dili na madugay ang Ecumenical Council makuha kamo, ug wala nay higayon unya alang sa Kahayag.

Atong iduko ang atong mga ulo.

<sup>188</sup> Langitnong Amahan, kini anaa na sa Imong mga kamot karon. Ako-ako nagpugas na sa Binhi. Ako wala mahibalo kong hain Sila nangahulog. Akong gipangamuyo nga Imong panalanginan Sila kong hain man Sila. Ug hinaut nga Sila makakaplag sa Ilang dapit sa ubos, langkaton ang mga batohon nga dapit, ug tanang mga ugat sa lunhaw nga sapinit, ug maingon kaniadto, ug hawanan ang tanan nga pagkadili matinoohon gikan sa agianan. Itugot kini, Amahan. Among gitugyan kini Kanimo karon, sa Ngalan ni Jesus Cristo. Amen.

<sup>189</sup> Sa diha inyong mga ulo giduko, inyong mata nga piniyong. Ugma sa gabii mao ang usa ka kumbete. Ang mga makasasala sa

ciudad, Ako. . . kong itugot sa Ginoo, ako kinahanglan mosulti ngadto kanila. Ako nagasulti sa nagkasagol nga kongregasyon karon. Ako dili mangahas sa pagwali niini; makapahimo lang kini kanila nga buta pa kay sa kaniadto, nianang tigum sama niana.

<sup>190</sup> Apan, kamo, niining gabhiona, nagatoo ba mo nga inyong nakita ang ilhanan, ug madungog ba ninyo ang Tingog, kong mao man ug kamo ba mitoo? Ug kamo-kamo wala pa, kamo mitoo apan wala ninyo gidawat pa Kini, si Cristo diha sa Iyang kahupnganan, mahimo ba ninyo nga ipataas ang inyong kamot? Ug matag ulo karon magaduko na, ug ang matag mata piniyong. Ipataas ang inyong kamot, sa pag-ingon, “Hinumdumi ako, Igsoong Branham, sa dihang ga-ampo ka.” Malipay ako sa pagbuhat niini. Ang Dios magapanalangin kaninyo.

<sup>191</sup> Among Langitnong Amahan, ang Biblia nag-ingon, “Ingon sa daghan nga mitoo gibautismohan.” Ako nangamuyo, Ginoo, nga kining katawhan nga nag-pataas sa ilang mga kamot, nga sila mitoo niini. Sila wala pa mabautismohi diha sa Cristohanong bautismo, hinaut nga makakaplag sila ug iglesia nga nagabuhat niini, ug mabautismohan. Itugot kini, Ginoo.

<sup>192</sup> Hinaut nga sila dili lamang mabautismohan sa tubig, nga mao lamang ang usa-usa ka gawasnong ilhanan nga sa sulod aduna nay nahitabo. Ang Biblia nag-ingon, “Adunay usa ka Pagtoo, usa ka Ginoo, usa ka bautismo,” ug kanang bautismo mao ang espirituhanong bautismo. Ang lawas nga ginahugasan, kini maoy usa lamang ka sanglitanan, o sa paghatag sa usa ka ilhanan nga may nahitabo diha sa sulod. Apan kanang kalag mao kana pagabautismohan sa Espiritu Santo, mao kana ang Dayon nga nagasulod diha sa tawhanong kinaiyahan ug nagabag-o kini sa kinatibuk-an, aron paghimo niini nga usa ka magtotoo. Nangamuyo ako nga ilang madawat ang Espiritu Santo. Akong gimandoan sila Kanimo karon, ingon nga mga tropeo sa Mensahe, ug sa gracia ni Cristo. Sa Iyang Ngalan, akong giampo. Amen.

Karon uban sa inyong mga ulo nga giduko, sa matinahuron gayud.

<sup>193</sup> Anaa ako’y pito ka mga gutlo na lamang, ako-ako dili makahaman sa hustong takna. Ako-ako-ako dili na makahimo pa ug usa ka linya sa pagpangampo diha nianang kagamay nga panahon. Hangyoon ko kamo sa paglingkod diha mismo kong diin kamo. Akong gikasubo ang akong paglangan kaninyo. Kita mag-ampo alang sa matag usa. Kamong katawhan, ang pipila kaninyo nga ania dinhi nga anaay mga prayer card, ayaw’g kabalaka, among atimanon kamo.

<sup>194</sup> Apan atong tan-awon lamang kong ang Espiritu Santo magapadayag kanato karon, kong kamo nagtoo Kaniya ug kamo nagtoo nga kini mao ang ilhanan. Hinumdumi, ang Manolunda,

Siya kadto usa ka tawo; Siya mikaon, Siya miinom sa atubangan ni Abraham, ug bisan pa niana Iyang mahimo, ug si Sara diha sa tolda, Iyang ma-ila ang mga hunahuna kadto diha sa iyang kasingkasing. Mao kadto ang ilhanan. Siya kadto ang Pulong. Karon kon ang Pulong mahimo lamang moabot kanato, nan, usab, Iyang gisaad nga buhaton ang samang butang.

<sup>195</sup> Karon kamong anaa diha nga tigpaminaw, nga walay mga prayer card, ug nahibalo kamo nga dili kamo mahiapil diha sa linya, dili ako makahimo sa pag-ila kong unsa sa unsa gawas lamang ang Ginoo ipakita kanako. Akong . . . Ug kamo nagtoo nga ang Dios sa pagkatinuod moayo sa maysakit. Ako-ako butot kaninyo nga-nga motoo mismo karon, sulod sa pipila ka gutlo. Ug mag-ampo lamang, ug moingon, “Ginoong Jesus, nailhan ko ang tawo, nga nakigsulti, usa-usa ka tawo, apan gisultihan ako nga, nagtug-an kanamo karong gabii, ug gipamatud-an kini kanamo; nga, ang Espiritu Santo, nga dili mahimong patyon sa kalibutan.”

<sup>196</sup> Ilang nahimo ang pagpatay kang Jesus sa diha dinhi Siya sa unod; ilang gipatay Siya. Apan karon Siya nabanhaw, diha sa usa ka mahimayaong kahimtang, Siya dili na gayud mahimong patyon pa. Ug Siya miingon, “Dili na madugay ug ang kalibutan dili na makakita Kanako. Apan, kamo,” ang predestinado, katong mga gikatagana sa Kinabuhing Dayon, ang Iglesia, ang Pangasaw-onon, “kamo makakita Kanako, tungod kay Ako maga-uban kaninyo, ug maanaa kaninyo, hangtod sa katapusan. Ang mga butang nga Akong ginabuhat mabuhat usab ninyo.” Tanan kining mga saad Iyang gihimo.

<sup>197</sup> Karon, nahibalo ako sa dihang dinhi pa Siya sa kalibutan, Siya, ang Dios diha sa sulod Niya. Siya ang Dios. Siya mao ang kahupnganan sa Dios. Siya mao ang tanan nga Pulong sa Dios nga nahimong nadayag.

<sup>198</sup> Ug ang Biblia sa gihapon Dios, ang Pulong, ug anaa pay mga pinadayag nga igapadayag pa. Ug Siya miingon, “Sa katapusang mga adlaw, sa diha ang kalibutan mahimong sama sa Sodoma na usab, ang Anak sa tawo mapadayag.” Ug ang ilhanan sa Sodoma mobalik, unya ang Tingog magatawag balik sa katawhan, kadtong mga gikatagana sa Kinabuhi.

<sup>199</sup> Kita nahibalo, sa dihang Siya dinhi pa, dihay mga minilyon ka mga katawhan sa ibabaw sa yuta, nga wala gayud mahibalo nga dinhi na Siya; walay katarungan sa pagpakahibalo. Kita n’yo? Siya miabot alang niadtong mga predestinado nga makakita niini.

<sup>200</sup> Karon pag-ampo kamo. Karon paghilum pag-ayo. Ayaw paglihok. Bisan diin man kamo, sa mga balkonahi, diha sa ubos nga andana, bisan hain man kamo, ayaw-ayaw paglihok, lingkod lamang pagtarung, ug pag-ampo.

201 Moingon, “Ginoong Jesus, ang Biblia nag-ingon, diha sa mga Hebreohanon 4, nga Ikaw karon ‘usa ka Labaw’ng Sacerdote nga mahimong matandog pinaagi sa pagbati sa among mga kaluyahon.’ Ug makita Ka namo dinhi sa yuta, sa dinhi Ka pa sa yuta, ang usa ka diyutay’ng babaye usa niana ka higayon ang mihikap sa Imong kupo, ug Ikaw miliso, ug miingon, ‘Kinsay mihikap Kanako?’” Gipasalipod niya ang iyang kaugalingon, apan bisan pa niana ang iyang pagtoo maoy nagpaila. Si Jesus nagsulti kaniya mahitungod sa iyang talinugo, ug miingon kaniya “ang pagtoo maoy nakaluwas kanimo.” Karon Siya mao sa gihapon kadtong Labaw’ng Sacerdote. Kong Siya mao sa gihapon kagahapon, karon, ug sa kahangturan, kinahanglan nga molihok Siya sa samang paagi, kong inyong-inyong hikapon Siya.

202 Ug unsa may nabuhat ana kon in-ana? Anaay dapat usa ka tawhonong unod, sa yuta, nga magsulti sa Iyang Tingog. “Ako mao ang Parras, kamo mao ang mga sanga.” Wala nay laing paagi sa paglikay niini, mga higala. Kini mao ang Kasulatan. Kini mao ang Kamatuoran. Kamong mga ministro nagatoo ba, diha sa likuran? [Ang mga ministro miingon, “Amen.”—Ed.]

203 Karon kanang diha sa gawas, pagmatinahuron lamang ug pag-ampo, ingna, “Ginoong Jesus, pahikapa ako sa Imong sapot.”

204 Ug inyong makita ang labing haduol kanako, kawhaan ka tiil o kapin pa. Wala ako may nailhan nga usa ka kalag diha dapit. Wala man gani ako makakita kang bisan kinsa nga ako gayod nailhan, niining gabhiona, nga naglingkod diha; gawas kang Pat Tyler nga naglingkod dinhi sa unahan, akong higala. Anaay mga katawhan diha sa mga higdaanan, sa mga yayunganan.

205 Atong nakita ang usa ka yayunganan nga nabakante sa miaging gabii, ug ang tawo mibangon ug milakaw. Nganong dili man kamong tanan, niining gabhiona? Kita n’yo, toohi lamang, mao lamang kana ang inyong buhaton. Ang Iyang Presencia mao nay magabuhat niini. Ania Siya dinhi, kinahanglan nga mobarog Kaniya aron kamo banhawon sa katapusang mga adlaw.

206 Karon, kamo nga nagatoo, ug naghunahuna nga human na inyong pag-ampo, tan-aw lamang dinhing dapita karon.

207 Maingon nga si Pedro ug si Juan miingon, “Tutok kanamo.” Ug sila mitutok nga matinguhaon, ang tawo mitutok, nga nagpaabot nga makakita ug usa ka butang. Siya miingon, “Salapi ug bulawan wala ako, apan ang ania kanako . . .”

208 Karon, sa pag-ayo wala ako, apan ang ania kanako, ang usa ka gasa nga gikan sa Dios, akong igahatag kaninyo. Kong kamo motoo lamang niini, ang Dios mobuhat niini. Igo lamang ako maghangyo kaninyo nga toohan kini. Maingon nga maoy ania kanako, akong igahatag kaninyo. Kong inyong toohan kini, ang Dios maoy magabuhat niini. Sulayi lamang kini.

209 Ania, ania Kini mismo karon. Amen. Gusto ko kana. Aniaiy usa ka babaye nga naglingkod dinhi. Ingon ug daw masupang siya, nagalingkod dinhi mismo sa tumoy. Anaa bay imong prayer card, gining? Ingon ug masupang. . . Walay imo. . . Mismo dinhi, walay imong prayer card? Oo. Walay imong prayer card? Nagatoo ka ba, bisan pa niana? Ikaw wala nagkinahanglan sa prayer card, kon nagtoo ka.

210 Anaay paglanog sa tingog, mao kana ang hinungdan nga malisod ang pagtawag sa katawhan nga sama niini, apan tinguhaa ang pagpaminaw kanako kutob sa inyong mahimo karon.

211 Wala ako makaila kanimo. Walay imong kard, tungod niini dili ka makaanhi sa entablado. Kon ang Dios ipadayag kanako unsay imong kabilinggan, motoo ka ba nga (unsa?) kini mao ra nga butang sama sa Iyang gipadayag ngadto sa babaye kong unsay iyang kabilinggan? Ang babaye didto sa atabay? Si Sarah, kon unsa kadto iyang giingon, ug uban pa? Motoo ka ba niana? Nagatoo ka ba mamaayo kini tanan?

212 Ikaw naga-antus sa sakit sa dugo, adunay kadaut sa imong dugo. Kong husto man kana, ipataas ang imong kamot. Buweno. Wala na kini kanimo karon. Kini nahimong Kahayag sa ibabaw nimo. Gidawat ka ni Jesus Cristo.

213 Karon, wala ko pa gayud nakita ang babaye, sa akong kinabuhi. Karon unsa man kana? Kini mao ang Espiritu. Karon makahimo kamo sa pag-ingon sama sa mga Fariseo, “Kana mao ang yawa,” bueno, inyo nang nadawat ang ilang ganti. Kamo moingon, “Kini mao si Cristo,” inyong madawat ang ganti ni Cristo. Ako nagtoo nga kini mao ang Pulong nga ginapaila niining katapusang adlaw; dili ako.

214 Dinhi, aniaiy laing gamay’ng babaye nga naglingkod mismo dinhi. Siya naga-antus sa barikos sa ugat diha sa iyang mga bagtak. Siya may mga kakulian. Siya anaay balatian sa kasingkasing. Siya naga-ampo alang sa usa ka minahal sa kinabuhi, nga usa ka igsoong lalaki. Siya nagahilak karon. Siya anaa sa pagpangamuyo. Kanang maong igsoon talandugon na kaayo. Kini usa ka suliran sa diyabites. Ug, usab, ang lalaki anaa pay laing landong, siya usa ka makasasala. Ug ikaw naga-ampo alang kaniya. Kana tinuod. Miss Welton, kong motoo ka sa bug-os mong kasingkasing, buhaton kini sa Dios ngadto kaniya. Motoo ka ba niini? Mao kana ang inyong ngalan.

215 Karon kana bay molabaw pa kay sa unsay giingon ni Jesus ngadto kang Simon, “Ang imong ngalan mao si Simon, ikaw anak ni Jonas”? May pagtoo lamang. Ayaw pagduhaduha niini. Toohi kini sa bug-os mong kasingkasing. Kong toohan mo kini, buhaton kini sa Dios. Kong ikaw lamang. . .



216 Dinhi, aniyay usa ka gamay'ng babaye nga naglingkod niining dapit, nga nagtutok mismo ngari kanako. Daw mapula ang iyang buhok. Ang iyang buhok nakabugkos.

217 Dili ba ninyo makita kanang Kahayag, daw may pagka dalag, nagalingin sa ibabaw sa babaye? Siya nahibalo nga nagahinabo kini karon, kay iyang nabati Kini. Haduol Kini kaayo kaniya, dili mahimo nga dili niya mabati Kini. Kong tinuod kana, gining, ipataas ang imong kamot. Tua ra siya.

218 Karon ako hingpit nga langyaw alang kanimo. Ako walay nasayran mahitungod kanimo. Apan anaa ka diha nagalingkod nga naga-ampo. Husto kana. Kong tinuod kana, iwagayway ang imong kamot sama *niini*. Karon, kong si Jesus Cristo mao ang Anak sa Dios, kinsa mao Siya, usa ka Labaw'ng Sacerdote nga nagalingkod diha sa too sa Dios. . . Ug ako igo lamang nagatindog dinhi pinaagi sa usa ka gasa, uban sa akong kaugalingon nga di- . . . gawas sa, gawas sa tawhanong pangatarungan, wala nagahunahuna sa akong kinaugalingon; usa ka paagi sa pagpahulay sa akong kaugalingong salabutan ug panghunahuna, ug tugotan lamang ang Dios sa paglihok. Nagatoo ka ba nga Siya. . . Ako, ang Dios nahibalo nga ako wala makaila kanimo; ug ikaw nahibalo sa mao usab. Sa ingon kon ang Dios magpadayag kanako sa imong kabilangan, o usa ka butang nga imong gipaabot, nga gitinguha, o butang nga labaw pa, nagatoo ka ba nga ang Dios mohimo, makabuhat niana?

219 Anaay imong kakulian sa imong likod. Mao kana ang usa sa mga butang nga imong gipangamuyo. Ug anaay imong kakulian sa imong mga mata. Nagatoo ka ba nga ang Dios moayo kanila ug ayohon sila? Nagatoo ka ba? Nagatoo ka? Nagatoo ka ba nga ang Dios mahimong itug-an kanako kong kinsa ka? Si Misis Hallman, nagatoo ka ba sa bug-os mong kasingkasing karon, imong maangkon ang unsay imong gipangayo. Nagatoo ka ba?

220 Dinhi usa ka totigulang nga babaye nagalingkod may gamay lang ang agwat sa likuran niya. Siya nagaampo, usab. Siya adunay diyabetis. Ako nanghinaut nga dili kini niya mapakyas. Kini anaa mismo sa ulohan niya. Siya daw idaran na. Sa makadiyot lang, hinaut nga ako tabangan sa Ginoo karon. Siya. . . Atua nadawat niya kini. Maayo. Akong nakita sa dihang siya nakigdugtong. Siya dili taga dinhi. Siya taga Louisiana. Ang iyang-iyang ciudad mao ang usa ka dapit nga gitawag ug Singer, Louisiana. Ug siya naga-antus sa diyabetis. Ang iyang ngalan mao si Misis Doyle. Kong husto man kana, ipataas ang imong kamot. Maayo. Ako hingpit nga langyaw kaniya, wala ko pa gayud siya makita sa akong kinabuhi. Apan si Jesus Cristo, ang Anak sa Dios, nasayran ang tanan mahitungod kanimo.

221 Adunay usa ka babaye nga nagalingkod diha sa likuran, gikan sa mao ra nga ciudad, usa ka dapit nga gitawag Singer. Siya naga-antus sa taas nga dugo. Ug ang iyang ngalan mao si

Clark. Nagatoo ka ba, Misis Clark? Maayo, imong madawat kong unsay imong gipangayo.

Nagatoo ba kamo? [Ang Congregasyon miingon, "Amen."—Ed.]

<sup>222</sup> Kana ang ilhanan! Paminaw sa Tingog! Paghinulsol, balik sa Dios sa labing madali kutob sa inyong mahimo! Si JesusCristo ania karon diha sa Gahum sa Iyang pagkabanhaw; ang usa ka dautan ug mananapaw nga kaliwatan nagadawat sa ilhanan ni Jesus Cristo nga nagapuyo sa taliwala sa katawhan. Dili kana Niya mabuhat nga ako lamang, kini kinahanglan sa inyo, usab. Kita n'yo, kinahanglan sa babaye nga mohikap sa Iyang sapot. Kinahanglan nga inyong hikapon ang Iyang sapot. Kita mga galamiton lamang.

<sup>223</sup> Nagatoo ba kamo sa bug-os ninyong kasingkasing? Karon kong kamo mitoo niana. . . Pila man ang nagatoo niini, ipataas ang inyong mga kamot, sama *niini*, ingna, "Sa tinud-anay ako mitoo niini."

<sup>224</sup> Karon kon kamo nagtoo niini, si Jesus nag-ingon niini, "Kining mga ilhanan maganunot kanila nga nagatoo; kon ilang ipandong ang ilang mga kamot diha sa masakiton, sila mangaayo." Nagatoo ba kamo niana?

<sup>225</sup> Karon halalum na ang kagabhion. Wala nay atong panahon. Anaa na ta sa kawhaa'g lima ka gutlo paadto sa alas dies. Mahimo bang ipandong na lang ninyo ang inyong mga kamot sa ibabaw sa usag usa, kong in-ana? Ug buhata lamang ang unsay akong isulti kaninyo karon, ipandong lamang ang inyong mga kamot diha sa usag usa.

<sup>226</sup> Karon nahibalo na kamo, diha sa ibabaw, bisan kon diin kamo karon. Karon nahibalo na kamo, maingon sa bisan unsang butang karon, human nga ang Kasulatan gikawali ug sa matinaw naila bisan asa dinhi sa gambalay.

<sup>227</sup> Akong nakita ang usa pang lain, mismo karon. Kita n'yo? Ug ang lain pang usa mismo dinhi, kakulian sa prostrate. Usa ka babaye nga may TB. Uh-huh. Maingon, kini anaa na sa bisan diin nga dapit karon, apan nakapaluya Kini kanimo.

<sup>228</sup> Unsay kalainan, unsa pa? Inyong nasaksihan ang kalim-an, usahay anaa kana, ug buot pa kamong makasaksi sa kapitoan sa sunod nga higayon. Gibuhat ni Jesus kana usa ka higayon didto sa Sicar, ug ang tibuok ciudad mitoo Kaniya. Sila nagbantay alang sa Mesiyas.

<sup>229</sup> Ang Mesiyas ania dinhi, ang Espiritu Santo, ang Mesiyas alang niining panahona; ang Mesiyas nga nagahimo sa Pulong nga mapamatud-an, nga Iyang saad.

<sup>230</sup> Karon buot ko nga ang matag usa kaninyo, samtang inyong ipatong ang inyong mga kamot diha sa matag usa, kong kamo mga magtotoo. Karon ayaw pag-ampo alang sa inyong

kaugalingon. Pag-ampo kamo alang nianang tawhana, ug sila magampo alang kanimo. Karon, mao rang Pulong nga gisaad kini sa katapusang mga adlaw, nagsaad usab . . .

<sup>231</sup> Ug hinumdumi, si Jesus nag-ingon, “Kining mga ilhanan maganunot kanila nga nagatoo.” Ang pagpang-ayo, nagabalik, maoy tingog nga ang ilhanan giila. Ilang gipandong ang mga kamot diha sa mga masakiton, ingon nga ilhanan; ang tingog maoy usa ka “halleluia, ang Ginoo nag-ayo na kanako!” Karon kong kining mga ilhanan nag-uban sa usa ka tingog, kanang ilhanan, kon ikaw usa ka magtotoo, kini maganunot. Ang tingog maganunot sa ilhanan.

<sup>232</sup> Kong akong ihatag kaninyo kining ilhanan, nga akong giingon kaninyo nga kini nagagikan sa Dios, ug ang Dios gisaad kini niining adlaw; kini gikapahayag na sa labing maayo, wala na gayud kondili ang usa nga walay pagtotoo maoy molikay gikan sa pagtoo niini. Kita n’yo? Ug unya ang Dios miatubang ug gipamatud-an kini, aron buhaton nga ing-ana. Karon ania Siya dinhi.


<sup>233</sup> Karon ang matag usa, diha sa paagi sa inyong pag-ampo sa inyong kaugalingong simbahan, kong alang kini sa imong kaugalingon, kusga, bisan unsa kini, ampo-i ang tawo nga imong gipatongan sa imong kamot, kay sila nagaampo alang kanimo.

<sup>234</sup> Ug karon hangad. Ug sa Presensya sa Mesiyas, ang Cristo, ang Bugtong Nabanhaw, sa gihapon buhi human sa duha ka libo ka katuigan, unsaon man nato sa pagkawalay umoy diha sa Espiritu? Kana angay Ipadilaab kining nasud. Kana mao ang angay magpahinulsol sa Beaumont, diha sa sapot nga sako ug abo. Apan kini mobuhat ba niini? Dili.

<sup>235</sup> Apan kamo nga nagapangita Kaniya, ug mitoo nga Iyang pagabuhaton kini ug tumanon ang Iyang Pulong, kini anaa na kaninyo karon ang saad gikahatag. Ipatong ang inyong mga kamot diha sa matag usa ug pag-ampo, samtang ako mag-ampo alang kaninyo gikan diri.

<sup>236</sup> Ginong Jesus, husto na ang gikaingon, husto na ang nabuhat. Ang Pulong nga kanhi gisaad nahimo nang nadayag. Ang Mesiyas, ang Cristo sa Dios, anaa diha sa Balaanong Presencia. Among gibati Siya. Among nakita Siya. Kami nahibalo nga gisaad Niya kini sa katapusang mga adlaw. “Maingon kanhi sa mga adlaw sa Sodoma, maingon man kini sa dihang ipadayag na ang Anak sa tawo.” Kon in-ana, among nasayran.

<sup>237</sup> Among nakita ang-ang kalayo diha sa kawanangan, ang mga bomba atomika. Among nakita ang mga kanasuran nga gikaon na sa mga ulod, ang mga nasud nagakabahin-bahin. Among nakita nga ang Israel anaa na sa yutang pinuy-anan. Ang matag ilhanan nga mahisaad, nangatuman na. Ang mosunod nga butang mao ang gisaad nga Anak, Ang pag-abot.

<sup>238</sup> O Walay Katapusang Dios, sa Presensya ni Jesus Cristo, ang gamhanang Espiritu Santo nga ania karon dinhi nga nagpamatuod nga ania Siya dinhi, patalinghugi ang pangamuyo niining katawhan, patalinghugi kining mga Cristohanon; nga, sa diha akong mobiya, dili sila magaingon, “Si Igsoong Branham gibuhat kini.” Si bisan kinsa pa wala nila hiilhi, mipandong kanila, ug sila nangaayo. Apan Imong gisaad nga ang Tingog anaay ilhanan diha niini. Ug hinaut nga sila maayo, sa diha akong itugyan sila Kanimu, sa Ngalan ni Jesus’ Amen. 

*ANG TINGOG SA ILHANAN* CEB64-0313  
(The Voice Of The Sign)

Kining Mensahe ni Igsoong William Marrion Branham, una giwali sa Ingles dadtong Biyernes sa gabii, Marso 13, 1964, sa Municipal Auditorium sa Beaumont, Texas, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2007 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)